



廣州府志

ル 5
1212
48



樂仁

黃州府志

卷一百三十二

區陽二

列傳二十一

一

凡 58
1212
48



廣州府志卷二百三十二

列傳二十一

國朝

順德

鄧之楨

陳彩

劉振國

黃聖

胡高德

子國相

陳恭尹

孫世和

彭祖曙

父天植

胡天球

李向日

薛起蛟

父天植

羅華

曾光龍

子朝侯

何絳

孫濱 兄衡

龔應霖

孫珏

羅孫耀

孫天尺

楊龍炳

黃夢暄

勞溫良

蔡洪績

梁任

歐陽二酉

子達

廣州府志卷二百三十二

列傳二十一

鄭際泰 兄啟中

岑嗣恪

何有年

楊一鳳

羅良會

區遇 子士鑑

梅本深

梁友遠

曾良學

陳憲祖 從兄際臨 族子見龍

鄧賢

蔡雲翔 孫體元

梁學源

龍海見 吳奇遇

盧上進

何開泰

梁澤

張權

羅慶 父起渠

潘世禧

關國欽 國儀 國虬

吳永發

梁成之

胡汝峙

黃承珣

何士達

余錫純 父象斗 子于鶚

蘇正學 子經綸

胡炳

胡建中 子經綸

鄧代環

胡蓉 父天運

何毅夫 游法珠

蘇珥 陳海六 潘憲勳

胡大猷

吳經緯

鄧在文

梁善長 吳文正

梁翰 族弟藹如

梁兆榜 從弟森

梁泉

陳光祖 陳應魁

歐象壯

梁尙秉

梁植 劉鳳鳴 何曾

關學優

胡亦常 父傑

黃臣鳴

黃伯毅

溫汝能

張錦芳

弟錦麟

羅禮璋

國朝

鄧之楨字應桂順德人慷慨負氣節登崇正丙子賢書順治四年任興業令土寇譚榮亂攻城之楨率士民登陴守禦四月城破之楨瞋目大罵不絕口賊叢刃刺之遂死據興業縣志修

陳彩字美公平步人順治九年壬辰進士選宏文院庶吉士轉秘書院編修乙未分校禮闈所取士如顧豹文徐元珙王士正輩皆海內名彥外轉江右憲副政聲藉甚尋補湖北鹽

道遷蘇松常三郡參政廉介自守百度簡肅署司臬事公明為江南冠後以失察註議罷歸經部駁正而彩已先卒著有

鳴笑軒集

據張府志順德志修

劉振國字美徵逢簡人順治八年辛卯舉人授真定理刑稱廉明有謫令某被逮前任訊入重罪振國憫其冤故稽限需赦活之嘗讞獄上官有所私強其更斷三駁不徇改西和令安集流民陶冶多士捐橐代清積欠天寒散給冬衣上官誤以為富將中傷之乃告歸據順德志修黃聖字圖洛弼教人少負慷慨膂力過人年十六由行伍起家

國初平定廣西以功授會甯營遊擊陞山西太原參將所至盜息民安軍旅整肅擢副將轉靖武值滇逆據叛不屈被繫三桂敗得釋閒道赴撫蠻滅寇將軍傅宏烈軍宏烈嘉其忠題加總兵左都督進征雲南宏烈遭馬承之害遂以老病乞休子友瓚字盛文弱冠隨大將軍建義侯進征雲南積功累

授本省遊擊嘗以數十騎擊海寇於崖州殲其巨魁由是名鎮瓊南以撫戢生熟黎徭往來嵐瘴間勤勞而卒據順德志修

胡高德字公望一字飛熊桂洲人父永承以友愛馨產高德少慷慨通韜畧由鄉勇以功授遊擊防本境李定國將渡江鄉里震動率兵遏止之功甚偉遷嚴州民家失火高德叩祝風返火熄去嚴日領郡泣送調漳泉值遷析流離多所安集攝鎮澄海地經寇躡高德收瘞枯骨緩兵安民年八十九解組歸著有江上草北征草雲巖遺稿子國相字元節當偽周猖獗時與總兵左都督黃聖長子國禮冒險同入貴州黎平說各土司背賊歸欵斷賊餉道屢建奇績大將軍傅宏烈嘉其功題授監紀同知據張府志順德志修

陳恭尹字元孝龍山人邦彥子邦彥殉節時恭尹纔十餘齡

匿妻父湛粹所獲免比長賦姑蘇懷古諸詩傾動一時名大起其詩清迥拔俗得唐人三昧古體間入選理一時習尙無所染工書法新城王士正朱彝尊趙執信先後至粵於廣州詩人尤推重恭尹朱謂其降志辱身當進之逸民之列而恭尹亦以忠臣遺裔沈痛患難隱居不仕自稱羅浮布衣雖學與年深猛鷲之氣猶時發露也著有獨漉堂稿孫世和字聖取天姿敏絕詩文綽有祖風為學使惠士奇所賞以優行薦發浙江試用署鹽場大使革陋規除宿弊轉龍游丞歿於官囊無長物著有拾餘子草據阮通志順德志修

彭祖曙字葍菴雲步人順治十四年丁酉鄉薦選雲夢令諮訪民生利弊有歲抽布餉千金積弊已久盡為蠲免邑南有冤屍逆流而上祖曙廉得其實罪人伏誅解組歸民為立祠

據阮通志修

胡天球字瑞嘉李向日字伯南俱桂州人天球明崇正十五年壬午舉人向日順治十七年庚子舉人官高要教諭二人鄉居篤學好義康熙元年壬寅鄉為仇家所誣藩王大發兵圍剿萬命胥危天球暨向日冒刃肉袒軍前為鄉人陳冤被囚數月幾受戮既而監軍廉其情為之請鄉乃得免天球罄家貲犒軍著有柳名園詩集

據阮通志修

薛起蛟字牟山龍山人父天植明萬曆丙午舉人令閩清有惠政民立生祠祀之擢戶部主事丁內艱以毀卒起蛟與兄始亨並有文名學者稱為小薛補邑諸生舉明經淡祿仕務為有用之學為文力追柳州尤淹貫史學康熙二十六年聘修邑志繼修新會志考核精當年九十猶喜讀書卒時年九十

十有八

據順德志修

羅華字乾登大良人少任俠從軍總督盧崇峻拔充右營把總調澄海城守劉進忠叛脅之從不屈死事聞廕子萬象千總華祀澄海名宦本邑忠義祠

據五山志林順德志修

曾光龍字飛瞻樓人康熙三年甲辰進士授合肥令甫蒞任禁火耗革蠹吏與利除害民稱廉明調知鉛山當兵燹之餘加意撫綏是時鉛邑雖平而黃栢一方尚為賊首林爾瞻所據光龍親往諭令歸化悉就撫歸農大吏議功題敘適以憂去行李蕭然

據阮通志修

何絳字不偕號孟門羊額人性英爽族叔獻將生徒數百人令高足轉相傳授絳為都講每有論說簡要明通聽者愜意值明末多故乃自放廢徜徉羅浮西樵間既乃縱遊吳越足

跡幾半天下復與陶窳陳恭尹梁植暨其兄衡隱稱北田

詩粹

作西樵北田獨

澹集云村北五子聲著甚居鄉善規勸微刺婉諷聞者皆

服有閩客寄以三百金二十年不至絳老居破室一日客子

至詢所寄金絳偕至古井旁令自取之封識宛然素工詩著

有不去廬集孫濱好吟咏如其祖著有寄亭詩稿衡字左玉

號羅峯好學能文詞甯都魏叔子稱北田五子衡為最云窳

攜母與居而遊於外母死衡主其喪里病疫者多死衡徑至

其家為經紀有病中夢衡沃其背得汗愈者自是病即書衡

姓名揭側輒瘥

據順德志修

龔應霖號雨亭白藤人

陳志誤作黃連人今從采訪冊

籍四會康熙五年丙

午舉人初任甯鄉縣創書院設義學勸農恤商賦充民足邑

舊患虎蒞任未幾竟息民頌之行取刑科給事中轉工科掌

印奏請舉人得考中書以疏壅滯又請嚴禁學政叢弊病卒

於都子朝侯任鍾祥令邑隄漲潰捐修請賑有政聲朝偉由

南陵令膺卓薦孫珏刑部司務

據順德志修

羅孫耀號淡峯大良人登順治辛丑鄉薦任曲江教諭以廉

介忤韶守曲江生員干法事敗守徇幕私欲庇之不聽竟懲

焉守怒誣揭孫耀時屈丁酉公車挈家夜遁戊戌登進士除

貴州都勻推官值吳逆亂起解組歸會縣有軍事旁午令王

印奪於吏胥徵歛無藝孫耀計撓之揭八大罪陳於平藩令

亦汙孫耀庭質知其事直得寢遂隱石湖別業自立生壙門

植松三號三松處士與陳恭尹梁植彭睿壘吳文煒劉雲漢

結社流連山水制軍吳興祚行縣介香山令胡戴仁達意以

病辭制軍為詩嘆息去同年陳肇昌來督學致存問請通一

刺爲諸兒地不許俟差竣始投以札鄉居二十年以古道訓俗佻儇者輒相戒毋爲石湖處士知嘗設族倉歲歉賴活者眾子世斗肇慶廩生世舉號小英康熙癸酉副貢定安教諭子天尺字履先號石湖少以淹博聞年十七試有司日竟十三藝得心悸疾祖母梁戒毋攻舉子業四十五年丙戌舉於鄉益肆力事詩古文詞長洲陳璋宣城張汝霖眉山彭端淑秀水鄭虎文並與訂交而督學惠士奇知之尤深手錄其詞賦示諸生與同縣蘇珥陳海六輩稱惠門八子時天尺文名藉甚會開博學鴻詞科巡撫傅泰將薦之以母老辭一上春官不再赴養疴石湖而終著有瘦暈山房詩刪十四卷門人羅作屏所注詩集十卷文鈔若干卷五山志林八卷

志林道古
堂文集修

據順德
志五山

楊寵炳字温平桂洲人諸生嗜古成癖爲詩文力追作者康熙初海氛未靖寵炳首倡講學朔望集里人宣講

聖諭人敬信之性剛介見人有過輒切責開導服其讜論者嚴於有司之法癸巳大饑寵炳罄家資以周族黨雖擔石無餘勿恤也著有枕翠山房詩鈔

據阮通
志修

黃夢暄字廷煜號秀崙眾涌人少有膂力智勇過人海寇掠其鄉夢暄率眾守禦俟賊憊突出斬其渠餘孽驚潰一鄉安堵康熙九年順德鎮中軍周士英奉檄平廣西壯其勇任以先鋒恢復容藤二縣復與士英截李山官七於九江時容藤初平士民攀留遂委夢暄以千總防禦藤縣未幾以勞疾卒

據順德
志修

勞温良小勞村人順治十七年庚子舉人康熙九年庚戌進

士知隣水縣亂後署學並毀以紙書聖賢牌位朔望率士行禮俗新寡即嫁禁絕之時地徵僅三十金溫良實力勸墾數月增百卒後囊無以殮以同官購贈乃歸子熙載番禺歲貢

孫喬遷雍正己酉舉人

據順德志修

蔡洪績

榜姓

字非文龍江人淹貫子史善屬文兼長勇畧中

康熙十一年壬子解元甲寅山寇為亂洪績率眾守禦鄉以安堵是歲七月新會賊李山官七等屯劫龍山殺掠無算洪績率義勇截賊歸路官軍旋至賊眾就撫時有鄧周生者與

洪績同禦賊周生被礮傷死鄉人感其義勇

據張府志修江鄉志

梁任號郁盤泮涌人康熙壬子舉人知善化縣湖南之田自明萬厯間增築新堤湖涌逆流田不可耕任悉為清釐豁除浮賦會茶陵州亂大臣按州事至縣遣任往諭州民人皆危

之州民間任至迎訴前牧苛苦狀任為之開導州遂平以卓異薦擢禮科給事中卒於官宦囊如洗其門人為之殯殮云

據湖南通志阮通志修

歐陽二酉字學山三華人康熙壬子舉人授崇義令邑多曠土二酉捐備食器招貧戶開墾薄定其賦則草萊以闢故事丁祭品物皆舖店分行以供學吏斗役因之肆索二酉勒碑永革之雅意作人多士奮起甲辰丙午分校兩闈皆得知名士六載門無私謁有某生將以事關說二酉察知其情先詰曰若所袖者近菽乎某惶悚而退其和而介類此聞兄病遽解組歸攀轅留者百里不絕丙寅舉鄉賓八十一卒子達歲貢生與修府志好吟咏著有無逸堂集

據順德志修

鄭際泰號珠江林頭人康熙乙卯舉人丙辰成進士入翰林

廣州府志 卷二百三十一
籲請終養十年母卒服闋入都供職纂修

三朝實錄甲戌分校禮闈

召對瀛臺試理學真偽論畧謂道統開自畫卦自堯舜至周孔道著六經孟子功不在禹下漢賈誼董仲舒後宋之周程朱陸出而理學大振蓋古今無所謂理學止有父子君臣兄弟夫婦亦無所謂講學止有躬行實踐故五倫間以至誠自處者真粉飾欺世者偽要必天子以理學倡於上而後其下乃爭自濯磨有真無偽所謂聖作物覩也見者咸服其議十月擢吏科給事中明年三月京師雨愆期求直言際泰上五事中間停止在任守制一條議論尤正時順天學政李光地奪情請給假治喪言官交章劾之九卿議令在京守制至是際泰請停止一時直聲滿都下尋奉

諭辦事史館纂修

大清一統志以病告歸兄啟中積學能文官雷州教授爲士

林祭酒際泰師事之

據阮通志順德志修

岑嗣恪號樂懷桂洲人任虎門千總與同官江西王起龍東官王德貴共以忠勇相許康熙十九年逆匪趙昌入寇并力血戰死

賜祭葬廕一孫蒂福爲臨清衛千戶雍正二年祀邑忠義祠

三年祀京城昭忠祠

據五山志林阮通志修

何有年字振夫羊額人重然諾敦任恤康熙十八年己未海寇劫三大渡於黃涌赴水逃命匍匐至者二百七十人有年悉給以衣食助以資斧二十四年歲饑竭力捐資倡其族合賑四十餘日全活者三千餘人常買黃姓子爲僕念其父失

養給資遣歸閩里義之

據張府志修

楊一鳳字貫宸桂洲人狀貌奇偉勇力過人充撫標兵目熟

識海道歷本標遊擊會康熙十九年剿福建海陵賊謝昌李

積鳳等一鳳身先士卒與賊轉戰直搗其穴逆黨殲焉被擄

男女悉縱之焚其巢寨旋解組歸

據順德志修

羅良會號汾齋大良人康熙中海寇充斥良會以母病掉舟

市藥回中流遇賊將殺之良會請生還進藥雖死無憾賊感

釋之庚申謝黨劫掠良會負父而逃賊追及欲竝殺之良會

出腰金以贖賊嫌其少請曰可活父而殺子賊為所動乃俱

免

據大清一統志修

區遇字文聲號霖山石碇人康熙二十九年庚午舉人授秦

甯知縣革陋規設義學晨為士子講經書日昃則清理案牘

時有永興逆民猖獗遇單騎入寨諭以大義縛為首十八黨

悉解民建生祠祀之行取戶部廣西司主事監富新倉擢山

西道御史巡視北城不避權要雍正甲辰告歸年七十卒子

士鑑字闇公以明經授潮陽訓導資貧乏殷獎勵捐修 文

廟潮士德之

據張府志順德志修

梅本深字花北號半林龍山人輕財周急由歲貢官感恩教

諭感恩遠在海外應秋闈者艱於資斧本深助之擢樂陵縣

令下車問民疾苦邑有新舊帶徵錢糧斟酌緩急以紓民力

其有死喪遷徙舊多株及取足本深代為完納莅任三載清

積案弭盜賊尋升主事懇留者千餘人不得命乃為立碑建

祠年六十五卒於家

據張府志順德志修

梁友遠林頭人素驍勇康熙十七年賊李山官七等劫邑之

廣州府志 卷一百三十一 列傳二十一

林頭乾澗二鄉掠男女千口友遠憤甚截擊賊被擄者乘間奔逃友遠捍衛之賊擁眾追至復與戰被烏鎗中首而卒

通志

曾良學字超友少習韜鈴廣州左翼鎮馬應魁一見奇之委

以水師守備擢參將值海寇竊發良學統舟師力戰獲賊首

周玉敘功陞副將康熙十五年偽周將馬雄入寇良學禦於

江門十七年大臣交章薦之以原職管理順德鎮遊擊多立

奇功以年老告歸

據阮通志修

陳憲祖字務方大良人從兄際臨字務敦甫五歲讀書過目

成誦長工文詞康熙辛酉鄉舉當選官以母老不赴母卒始

為儋州學正訓士有方歲饑捐脩脯倡賑存活者眾儋人感

之憲祖舉康熙甲子鄉書令平原調長山釐漕弊革浮費癸

巳水災請蠲卹贖三上卒得報不假胥吏羸弱悉均宵小藉

饑竊發峻治之莅長五年不名一錢縣當山左孔道供億旁

午不派里民遂以挪墊聖誤降調歸士民相率助完公帑資

其行費家居常屈已以便人城西金榜山舊有浮屠為祖墓

利山下居人乘颶風拔頂遽毀之族將訟焉憲祖不可遂止

族子見龍字滋權乾隆丙辰舉人令保定革路役需索弊添

快役分道責緝革役樊青等劫掠行旅捕置之法值旱蝗竭

誠露禱雨下蝗滅尋致仕歸

據趙之遴撰送憲祖序五山志林順德志修

鄧賢字聖賡龍山人平生仗信義臨敵果敢康熙間由伍累

官福建提標遊擊巡海遇賊力戰死

據龍山鄉志修

蔡雲翔字允大號鵬九龍江人康熙三十二年癸酉鄉舉合

灌陽釐積弊勸農興學癸巳歲饑請卹會分校將行發不俟

報先為賑貸民徭皆得實惠遇旱詣城隍虔禱雨立沛火災朝服拜之風返火滅膺卓薦以憂歸百姓泣送之居鄉捐粟倡賑里黨皆感其德孫體元字懷萬受祖訓有志經學府增生試經解輒冠曹年六十四卒著有周易書禮四書講義春秋左傳評義子良穀以明經選普甯訓導據順德志修

梁學源字克祖號壺洲大墩人弱冠補清遠生員旋食餼康熙三十二年癸酉舉鄉試成三十六年丁丑進士時粵中嶺南義學羣材咸萃當事方思振作會學源需次南歸延就講席從遊者歲數百人每晨起肅坐以經史證四子書口如懸河環聽者無倦容課日援筆成程文多士奉為格式甲申選安福令抵治清勤幹儉以海忠介自期前令虧缺知府責使代承學源曰承之取償於下則病民不承又忤上則病已顧

與其病民不如病己且潔身去己猶未遽病也遂上其事巡撫直之事遂解歲歉請緩征為粥以賑民賴全活尋署太和值境內患虎為文告神虎相率遁去乙酉分校易經房所得士多騰達終以強項不容謝病歸粵秀書院興延主講席負笈之士視義學倍焉初學源貧從世父業木工於梧州值學使者按臨以製卷篋未就吏擱之三學源以為大辱持斧臨江大呼祝神曰天果令吾以此賤工終也則沈吾斧不然宜浮祝已擲斧適中江干木杙見者駭之自是決志向學不十年得第嘗假是以勸學至今兩粵人能道其事者著述頗富所存有宦遊囊贖入燕吟一路筆談金陵草據順德志五山志林修龍海見號金山大良人登康熙己卯鄉榜合信陽俗醇樸撫以慈惠自經教育後人才科第倍他邑庚子甲辰分校鄉闈

稱得士壬寅張府志作壬申早捐錢捐粟全活甚眾地當衝要橋梁

悉為修復解西北軍需得敘薦陞德州以母老乞歸養士民

送者萬計吳奇遇亦大良人家貧力學授靈寶知縣勸農桑

清案牘延師教士分俸錢為膏火費文風日上中州鹽引為

官累上書制府釐剔夙弊同僚咸便上游嘉之會西藏用兵

道經靈寶供億不派於民虧帑數千落職民爭代償行時士

民送數百里建祠以祀晚貧之愈嚴操守著有四書釋義易

經撮要圖註葆光堂稿療憂草宦海狂吟贖藝據順德志修

盧上進字闇思龍山人康熙丙子舉人宰鄖縣清勤自矢縣

界河南浙川陝西商州有五泉相連名曰五股泉水散漫無

歸上進築堰四旁分溝灌田民利之號盧公堰田之荒蕪者

招徠墾闢設立義學親課生童文風以振尋題陞未赴卒鄖

民立祠祀焉據張府志修

何開泰號東墅羊額人康熙己卯舉於鄉任汝川縣值用兵

西藏軍需輓運諸州縣均供一站汝川獨當其三開泰請減

其二道路崎嶇開泰合番民開闢匝月成康莊軍馬商旅咸

便之因名何公道遷順天府通判驗封司員外郎以足疾歸

十餘年卒據順德志修

梁澤字恆白倫教人曾祖在廷萬厯甲午舉人知賀縣遷敘

州通判澤康熙己卯舉於鄉慨然志於循吏見雷州陳瓚於

都問以治法陳以不紛更不受錢語之遂守之終身年五十

六選海鹽縣知縣值生朝庫吏奉里甲金各二十為壽澤受

為完其課故事縣漕六萬石加銀二錢一歸令一備供上官

澤曰上官方嚴檄杜弊敢相污耶悉革之海鹽近海塘旗兵

失鷹責償村民毀其家民泣訴於澤命繫至自稱查塘官索
牌驗無有澤怒曰逃人也釋汝則我受處分重械送巡撫巡
撫咨將軍治罪由是聲益著民建廟祀焉既而攝秀水改桐
鄉政如海鹽前令死家不能歸食且絕為贍其衣食籌歸之
性愛士學士盧文昭少時父為怨家誣陷澤白其誣才文昭
召入署課之所拔士如副使屠嘉政學使王應彩御史諸錦
皆知名當世聞中得士如吳方平日燥桑調元等七八輩咸
取上第杭世駿獨雋詞科人服其藻鑑辛丑以薦行取主事
適丁內艱服闋以民欠案發還海鹽留八年士民饋薪米不
絕事已而澤亦倦歸矣乾隆二十四年己卯重宴鹿鳴三十
年乙酉文昭來粵主試所取解首梁泉即其族弟也偕與謁
見執禮甚恭人皆羨之戊子卒年九十六據順德志修

張權號異菴道教人康熙壬午武舉任恩平守備訓兵有方
癸巳冬賊周廣生等焚劫城南權領兵出敵中礮死

賜祭葬祀忠孝祠據阮通志修

羅慶號魯亭杏壇人父起渠品行式於鄉慶稟庭訓盡讀宋
五子書道義自持長壽庵僧大汕人多敬禮之江南潘耒遊
粵撰砭狂錄以斥其妄慶復暢以吾儒仁義之旨文筆兀異
持論嚴正未見之遂深相結納著有閱歷隨書論不嫁殤事
尤於風俗有關云據阮通志修

潘世禧號瑞五大嶧人事母以孝聞母歿三年未嘗見齒兄
久病拮据調治湯藥必手進執兄喪亦盡禮一門四代四十
餘口同居共爨人稱孝友之家據阮通志修

關國欽國儀國虬容奇人兄弟三人篤於孝友母病衣不解

帶朝夕虔禱及卒水米不入口數日哀毀骨立既葬有感輒哭每哭時慈烏翔鳴屋上兄弟不分居甘苦與共有所借貸察其人孝弟即焚其券有錫類之美焉據阮通志修

吳永發字國彥大良人早失怙事母孝雖垢服溺器必親為滌濯居母憂不飲酒不茹葷寢不入內語不見齒好施與親舊有求無吝據阮通志修

梁成之字文升號兼善起季子禎之裔禎子宗玉元末娶關敏妹遂為黃連人成之新會庠生母患目疾積年不愈成之日久涕泣乃以其淚洗之越十四日而愈人競傳其事名之曰洗眼秀才歲饑賑宗族於祖祠又為粥於道以待鄉之餓者據阮通志修

胡汝峙號九峯欽天監主簿奉養父母不辭拮据繼母葉患癰疽人告以舌舐可愈汝峙如其言吮之遂愈癸巳戊申歲歉倡賑捐穀三百石存活甚眾餘多善舉據阮通志修

黃承珣字公謀明大學士士俊孫少補諸生既孤事大母潘盡誠竭力值寢疾躬親溺器衣不解帶者經旬及歿哀毀踰節一慟而亡士林深悼之據阮通志修

何士達少有文名康熙戊子鄉薦已丑成進士尚廉隅恥奔競任廉州府教授俗俊秀教讀者歲暮教官遣索其貲曰餘脩諸生見必補金以入士達撫然曰無恥至此無怪士習不端也槩辭之時士不務實學率守兔園冊獵科名士達日出坐堂齋召諸生論文較藝博以羣書士知向學貧者每給以薪水秋試不能行則資其道費督學惠士奇將薦之士達旋卒廉人稱曰明恬先生據張府志順德志修

黃川子志 卷一百三十一 列傳二十一 五

余錫純號兼五大良人父象斗號齊樞力學工詩文順治甲午鄉薦辛丑成進士觀政刑部以母老告歸遞修壬子丁卯兩志性冲淡好遊覽八十猶好客相與賦詩令子孫屬和為樂著有詩林正宗韻林正宗韻府羣玉嘯園詩稿錫純少慧遊番禺庠久困場屋以歲貢任陽江訓導尋歸與縉紳名士結社城南觴詠無虛日雍正中將纂輯一統志預令直省先修通志總督郝玉麟開局粵秀書院錫純與焉凡八閱月而成復修清遠縣志皆詳簡有法年九十三能書蠅頭小楷扁舟挈奚童往來村落間即景成吟興致不減越南尚詩賦河仙鎮洋官莫某者本中土人通文翰縣人有賈其地者投以所鐫錫純詩冊獻莫讀而善之飲賈問作者何如人賈以三世並享科名夫婦齊眉及見四代今耄尚健步對莫嘆曰福

人也著有語山堂詩文集卒年九十五子于鶚字闓西雍正

七年己酉舉人嘉應州學正著有退軒詩鈔據順德志修

蘇正學碧江人少聰穎敏捷登雍正癸卯鄉薦令石埭持守

清介矜卹用刑獄囚薪米皆躬自給發勤於課士貧者月給

錢米改德慶州學正賦詩論文無虛日卒無以殮士民助之

著有宦遊草陵陽別言據順德志修

胡炳字安貺豸浦人端方嗜學幼失怙恃哀毀如成人結廬

墓側朝夕悲哀聞者傷之有四書講義詩集行世據阮通志修

胡建中字砥如桂洲人歲貢生少失怙事母以孝聞弱冠為

世父嗣善事繼母雍正間連年饑饉建中捐米粟二千餘石

賑卹貧人全活甚眾子經綸乾隆乙丑武進士一甲第三人

官山東參將據張府志順德志修

鄧代環字之循有至性少丁父憂三載寢苫塊不出戶竟以此致疾卒兄嘗奪其產不與計兄亦感而還之著有易經豕

燭四書遺講

據阮通志修

胡蓉字澤東桂洲人高德曾孫父天運字會明雍正二年捐穀建義倉讀書羅浮不入城市蓉好讀書不善舉子業然老猶應童試應黜必衣冠以揖佻達者目笑之不顧也生平留心廣東文獻自通志以迄府廳州縣志時賢縉紳誌狀皆搜存之輯為太平錄百二十有一卷粵中山川名勝人物藝文畧具焉未幾卒

據順德志修

何毅夫名懋士以字行三桂人舉乾隆丙辰鄉試乙丑成進士用知縣攝維容永安並因俗革弊民有欠械久不能完釋之買商賈物定以例價關權舊以嚴苛為行旅病革其濫罰

一依木榜征課調昭平昭平獠獠雜處初至即捐修學舍延師主講民俗漸變先是土產佛手柑前官以分餉上游責供於民毅夫至則除之遇歲祲以災報遂劾引疾歸著有浣花堂集八卷游法珠字桂涯大良人乾隆元年丙辰舉人逾年丁巳進士初任信豐改廣豐擢贛州郡丞皆稱職信俗善訟祀一鬼狀猶惡相傳禱之輒勝法珠聞即督役焚其廟役懼禍不敢動法珠怒乃手斷其泥脰民始駭服先是牘繁案積告侵奪墓地者支離無可讞為文告剴切曉導塵案頓清先後嘗三校文闈所薦悉宿學士去後士民爭祀之

據順德志修

蘇珥號古儕碧江人生七歲即能文長而博學雍正初珥年十三受知督學惠士奇與同縣羅天尺陳海六南海何夢瑤入幕襄校稱惠門四俊十三年乙卯開博學鴻詞科刑部右

侍郎楊超曾以珥薦與南海勞孝與同被徵約偕行珥謝曰予母八十矣不畏碧玉老人哂耶卒不試乾隆三年戊午舉於鄉母速乃行至都謁士奇士奇笑曰古儕不善揣摩屢躓場屋今竟售南海明珠盡入貢矣下第會士奇以事籍產珥率粵士醵金贖還紅豆齋居焉既歸不復出束脩所入購書著述自娛生平篤友誼聞夢瑤死拏舟赴其喪劉煥子不率教將置之死珥匿而教之數年得鄉舉爲文長於記序與書法皆名重一時然不輕出以巨金請文亦不受與遊非甚善不肯以詩詞贈答居恒簡脫不修容止當道欲一見方物色間珥方袖果實食行不顧也所著宏簡錄辨定筆山堂類書前明登科入仕考皆散佚惟安舟遺稿傳於世陳海六字鰲山喜涌人惠門八子之一士奇來提學教士習三禮三傳海

六實爲之倡尤潛心宋五子書以優行貢太學授八旗官學教習未入館而歸選饒平訓導與潮士奉士奇像配食韓廟云潘憲勳字華蒼沖鶴人少負異姿嫻聲律工畫花卉墨菊尤知名善騎射時武童及未試能詩賦者皆得就督學經古試憲勳卷爲士奇賞識補武生雍正八年己酉中武舉就節署讀書三年詩學益邃乾隆十三年戊辰選衛千總領江南漕運以詩謁沈德潛序而行之仁和杭世駿主講粵秀與訂交倡和其爲名流賞異如此

據楚庭碑珠錄五山志林道古堂集瘦暈山房集安舟集敬學

軒集

胡大猷字振五桂洲人明鄉賢胡與京曰乾父子大猷之高曾祖也大猷偉儀度講忠孝大節成乾隆二年丁巳武進士授侍衛乙丑外擢陝西平涼遊擊陞瓜州參將調紫荆關

有權稅由參將徵收大猷不以自潤慙副將遷湖南鎮守鎮總兵時緬甸不靖官兵過湖南奉調沅州督辦軍務旋署提督逾月移雲南普洱鎮途次得

旨命赴木邦進剿緬甸感激

知遇誓從將軍指揮破賊既至領兵援錫箔橋守葫蘆口俄見賊抄小路圍木邦急回兵且戰且守相持久之日猝中鎗傷膝猶負痛躍怒馬先士卒奮擊復棄馬步戰手刺賊數十人歿於陣大猷初以退保木邦被議褫職至是

詔復原官

據采訪冊修

吳經緯字德芳桂洲人幼以孝友聞承顏諭志聚順不違執親喪杜門泣血聞者傷感與兄經武友愛食必先進有事稟命而行乾隆二年丁巳薦饑捐米賑濟全活甚眾其義類如

此以青衿終據張府志修

鄧在文字貢園龍江人歲貢生少以孝友聞大母年逾七旬家貧歲歉不給於供減已膳以佐大母餐事父母凡所需輒先意承之晨昏定省無少懈父病籲天求代父病旋瘥後司鐸歸善獎勸諸生以孝弟為先務文藝次之經師人師咸謂兩無憾云卒年七十有二

據阮通志修

梁善長字崇一倫教人乾隆戊午鄉薦登己未莊有恭榜進士需次歸築鑑塘與羅天尺蘇珥何夢瑤陳海六輩討論聲律嘗病黃登五朝詩選持擇未當乃自唐迄

國朝四百十有三家揀其精粹者詳為評註刻曰廣東詩粹出令陝西白水以良吏自期地磽多逋賦善長令一金減耗五分積賦爭完故事民歲有薪鹽銀當商有節饋皆數百金

申請裁免歲歉籌賑不假手胥吏他縣民多就食者調澄城再攝蒲城政尚寬和且出坐外堂訴者立結民大德之庚辰調邵陽值山水暴漲壞民居捐金為修復民像祀焉故事監生初見贄金十二撥修古華書院復捐俸佐膏火朔望課士飯而返役控馬駝籠燈送之韓城王杰未第時亦就課焉會軍事旁午驛馬芻糧皆親巡按給不以累民居陝十五年聲績茂著甲申以薦擢建甯同知有恭方秉節十閩握手道舊而善長遽卒抵任僅八閱月也所著有賜衣堂文集鑑塘詩鈔葭州吟北岸小草鑑塘詩續稿孫之任嘉慶甲子舉人吳文正字念中黎村人少與善長同學同舉登第歸善長旋主粵秀講席文正亦授徒多所成就既而令懷來縣有玲瓏壩旋修旋塌歲廢帑項文正履其地以長峽峭壁足束殺下流

為圖陳上官停之屯賦產去糧存為民病為立過割滾單積弊遂清軍興役民均其貧富薦擢昌平州被議解任旋卒據順德志

梁翰字遇屏麥村人僑寓佛山乾隆甲子舉於鄉戊辰成進士令羅源修城垣行社倉法禁民火葬戒民溺女民俗為變歲旱以粵田水車製教民做為之民便甚號梁公車為治八年羅民愛如父母甲申署邵武同知以病移歸翰族弟藹如字遠文號青崖嘉慶十三年戊辰舉人會試不第就內閣中書十九年甲戌成進士即補閣缺旋告假歸與南海庶常謝蘭生縣令黎階平相與講明心見性之學運氣調息無間自言酒色財氣不能累之識者咸以為實以壽終據順德志

梁兆榜字尺波黃連人父登乾隆戊午舉人兆榜乾隆丁卯

舉人辛未進士改庶吉士散館出宰鹽山大姓倚吏胥爲奸
侵漁稅戶有積逋十年者至卽密捕易庫銀吏置於法其黨
伺隙輒隨事摘發令民得自投賦吏不復逞會報田有蝗守
督捕至縣兆榜病迎以僕守故悉其治狀麾令歸語勿遽出
兆榜曰非吾親行不可然實不能起則以帶約諸輿以出及
畦見蝗飛蔽空稼已緣捕踐壞撫軾大慟曰蝗盡稼亦盡矣
罰宜及吾胡毒民如是環輿農數千官泣亦泣劉猛將軍者
舊祠其地人揖曰神職治蝗令與神約三日蝗不去令黜神
亦終不得享祀越日蝗少又越日盡病亦旋瘥居五年豪猾
以次遠竄讞死囚必引問怨否無乃給之棺新守以墨著憾
兆榜不爲遷就將假事中傷焉上官聞反詰守守愈慚忿當
公讌語侵之兆榜怒曰公毋然士未可辱也守陽謝而伺之

益密卒不得其隙也以薦入爲禮部主客司主事遇事持大
體所議輒當鹽山父老歲至都門出豚麪酒果以獻循聲播
輦轂以京察擢長寶道兩權臬事值大兵征緬甸道湖南應
辦有法民不驚擾茶陵知州戴保豫築州城竣法當詣勘兆
榜不勘而保之有乘以叩閭者按驗時保豫已調且死州民
迎

欽使訴故牧賢勘工亦實覆奏得

旨嚴罪告者兆榜以未勘効力軍台逾年卒於戍從弟森字
挨庭作宰嘉興力清漕弊調劑務得其平讞獄明決上官合
清釐積案遷鹽運副使乾隆末

大駕南巡駐蹕西湖恭進迎

蠻雅樂取浙中故實有關民事者爲曲九齣以獻搜得蘇文

忠馬券石刻於榛蕪間大學士王杰拓呈

御覽遷守柳州歷權泗城慶遠太平卒

據順德志修

梁泉字崇簡善長從弟十六補諸生歷試第一文譽噪甚乾隆間學使夏之蓉按臨吏唱名及泉亟拱立曰讀君文久矣尙困一矜耶仁和吳鴻校士廣州謂泉君文傳嶺外久予得力居多君未必知之耳其爲名流激賞如此泉旣抑塞家又中落歲資館穀爲養生平卓犖之氣往往發洩於文詩亦沈著鍛鍊自成一家人先泉捷者類多迴翔館閣而泉猶未第也三十年乙酉以房官鄭天錦力爭舉第一次名爲南海勞潼潼素自負亦嘆服焉三十四年己丑會試中式總裁爲大學士劉綸於分校張曾做所薦取倍他房同事屬磨勘者軋之泉卷適出張房遂遭磨勘指疵凡數十簽下刑部提問考驗

無私狀

詔復舉人辛卯會試學士朱筠分房得卷嘆賞持示他房謂必泉也取次第五而廣東中額僅四又見遺壬辰過夏都門復失第返至運河南旺聞遭暑病卒爲文原本史漢取材莊騷所著讀史偶評十卷四書文四卷筆記四卷周易集證六卷詩文散在行篋孫高梧以索序出沈舟牂牁未錄副嘉慶十八年國史館修儒林文苑傳徵取遺書未獲子姓訪輯十一刻爲敬亭遺文四卷

據順德志修

陳光祖號介堂龍山人膺歲薦援例選正指揮改同知出任廣平城外舊有蓮花池歲規合以鹽埠質庫幾二千兩詳備修學及諸生月課獎貲奉解陝西軍需採買江南物料承修戰船清查驛站勘八旗田畝經理皆得其宜攝知府事廉慎

有加案牘不假幕客乾隆五年庚申調正定以督造天津戰船積勞成疾卒所親凡二十餘人不析產用有餘即舉恤困乏同鄉陳應魁少孤受學於母乾隆二十四年已卯舉人知太平縣俗刁悍開誠以教不數月而風革尋調鄰水甫至詢問疾苦出每攜一吏一役周巡縣境以見聞資讞獄甘李皆巨族械鬪甘殺李數人應坐輒上下行賄買兇抵罪應魁閱供不符訊實悉置諸法未幾移疾歸士民依依不捨

據順德志龍山

鄉志

歐象壯字菊山陳村人母李歸五年而寡貧甚事育皆出女紅象壯甫能言聞鄰兒索父果餌問母父胡不歸母曰死矣又問死何時歸母指粟主曰此即汝父遂大慟不食多方慰之乃止遇歲時薦淚輒下長傭書肆以養母母病旦夕抱持

滌穢儉積二十金為所親誑去遽焚其券鄰人妻以妬為夫逐匿其家體母意衣食之委曲使完聚母生朝市脯酒獻跪膝前左卮右匕母擘脯置子口里人望見皆羨其樂即儂薄者亦敬慕之縉紳請旌其母而以象壯事狀陳令令敬之招之再乃詣見悽然曰小民有父不得養幸勿輕信眾言增民罪也善卜易年八十三預知死期謂得從親地下甚樂云乾隆中與邑人薛洞翔並以孝旌祀忠孝祠

據墓志廬山文集修

梁尚秉字文言林頭人乾隆丙子賢書第一聯捷進士令石門採辦倉穀二千石禁絕抑勒會大兵征緬甸派臺站解滇馬措理無誤調瀏陽歷永順清積贖懲健訟瀏有流犯耿某狡險結吏胥重利盤剝許者皆無如何尚秉嚴鞫之論如律永順為南楚邊苗地尚鄉苗為民患驅近村牛馬入山峪中

窖藏勒贖尙秉出健役徑抵其巢縛三十餘人差其罪輕重置諸法苗匪斂跡後以瀏陽命案呈誤歸杜門讀書以終

德志

梁植字符允逢簡人領乾隆丙子鄉薦官石樓令兩饑皆舉賑多全活五校省闈操守嚴介政務寬平嘗謂爲官但於人有濟得錢反爲子孫累耳令樓十三年不謀移擢升鶴峯州兩載攝判黃州值歲稔監賑麻城斬水杜絕胥吏侵漁民沾實惠旋署漢川告養歸鬻衣資舟車費同鄉劉鳳鳴字岐山乾隆二十四年己卯舉人歷令富陽桐鄉皆有聲在桐早禱雨立至民頌之撰記紀事致仕後釣遊自適今午橋釣臺垂竿處也何曾字日臨羊額人乾隆三十年乙酉鄉薦令鎮洋勤求民瘼悉心聽斷徐富南者犯事久在逃一夕忽自投曰

限至矣不忍累公願伏法有殺偷兒棄者莫得主名曾易服

緝於鄉老嫗密語之執訊果服邑東南河渠多淤得請次第

濬之癸丑甲寅頻年大水詳請緩征爲粥以賑復平糶常平

倉穀民德焉年六十卒於任

據順德志修

關學優號若谷容奇人乾隆庚寅舉人令慶元前令積逋賦逾萬催科火迫學優至卽請停採買歲報買穀三四百石裁汰陋規銀八百兩捐羨千金解正供以紓民困附郭姚姓先世以習羅教得罪遠竄宗支在慶者官歲一至其家搜捕典史則以月至滋擾苦甚學優與約令月一詣典史聽點而存結於檔吏胥自是不復擾政務簡要吏民相安邑乘久未修倡爲續志擇文秀士食而教於署文風丕變旣以親老請養會病卒代者以虧缺揭守王績著愕然曰關令日用錢不過

三百烏有是核之皆前任所流交代墊已三千餘矣竟厚賻而歸之據順德志修

胡亦常字同謙乾隆辛卯舉人父傑壬辰進士官吏部員外郎以學行名於時亦常少承家學抗志希古不欲為一鄉一國之士下第南歸與休甯戴震同舟至富春江乃別舟中盡鈔震所著書復致書宮詹錢大昕欲壹志於經術性素淵默事母盡孝有郭外田數十畝歲入悉奉甘旨亦常終歲饜粗糲自若嘗購書盈篋值數鎰謀諸婦脫釵釧償之不敢私取田之所入為文夏夏獨造詩妙悟天成不由師授能于南園諸子外自成一家人年三十一卒嘉定錢大昕銘其墓著有賜書樓初續集嘉慶十八年國史館徵其遺詩取以獻據順德志錢大

斯文集修

黃臣鳴字廷詔大良人乾隆丁酉舉人少嗜學刻苦窮經不問寒暑生有至性早失恃事繼母諸母撫愛幼弟內外無間言季弟丹書嘗從受業臣鳴悉心指授遂成大名為文力追先正學者稱叩山先生初以貢授南雄訓導革陋規日進諸生諄諄誨以經書大義督學李調元稱其不愧經師人師云卒年四十五著有盈缶堂稿行世據順德志修

黃伯毅字士肩龍山人乾隆四十四年己亥舉人少孤奉母家居執卷誦母側母喜益力學晝夜不輟鄉薦後日以養母課子為事鄉患西潦水漲入室伯毅負母走數十里餘弗之顧母病侍醫藥廢寢食及卒哭泣哀毀喪葬循禮里黨稱孝焉著有遠亭文稿卒年七十據順德志修

溫汝能字希禹龍山人乾隆戊申舉順天鄉試官中書科中

書尋乞歸事著述築中齋於蓮溪上藏書數萬卷寢饋其中雖盛寒暑不輟也生平好施數急人難同里孤貧待給者無慮數十家倡復龍山義倉凡救荒捕盜養老恤孤勸學之費皆出於此時洋匪滋事乃募鄉勇請於官得鑄礮而賊果至連檣數百艘急攻黃連汝能率鄉勇救之黃連故無火器至則發礮擊賊賊氣奪攻六晝夜不能破乃退越二日又至圍六日解去論者謂賊不能踰黃連長驅大良者汝能之力也年六十四卒所著有謙山詩鈔文鈔孝經約解龍山鄉志又刻粵東詩海一百六卷文海六十六卷網羅散佚尤有功於

文獻云據順德志修

張錦芳字藥房龍江人乾隆庚子解元己酉進士改庶常授編修初以經術補優貢入京師嘉定錢大昕河間紀昀見之

目為奇士錦芳淹貫羣籍通說文之學分隸得漢人法兼嫻繪事出其餘技足以輝映一時而於詩所造尤邃與欽州馮敏昌同邑胡亦常稱嶺南三子有三子詩刻傳播都下益都李文藻官粵又與黃丹書黎簡呂堅刻為嶺南四家皆以錦芳為弁冕天性孝友事親能測意指恭畏愛慕常若童穉以仲兄暨弟錦麟早世淚常盈睫迨登第聞伯兄訃益自傷遂乞假歸養未幾卒年四十有七著有南雪軒文鈔二卷逃虛閣詩鈔六卷南雪軒詩餘一卷錦麟字瑞夫乾隆戊子舉人幼絕慧十歲通經能詩稍長與錦芳竝為北平翁方綱所賞有雙丁兩到之目錦麟性孤介詩標新領異南園以後諸子視之蔑如也著有少游草年二十九卒據四家詩鈔小傳邵晉涵張君行狀潛研

堂集順德志修

羅禮璋字獻玉大良人少讀書有奇氣貌偉善射乾隆辛丑成武進士揀發福建署提標守備晉署督標參將值臺灣林爽文作亂禮璋請率師渡海剿辦大小十三戰直刺賊巢鋒無少挫諸路一舉蕩平壬戌博羅會匪滋事禮璋攻克義容天字嶂斬馘數百擒偽王關奧龍等餘黨就撫惠民以安攝廣西新太慶遠二協調劑兵民恩威並用尋擢河北遊擊爲卒旅籌糧秣經久計潔已奉公有救苦羅菩薩之頌先是廣西太平府水爲土山所夾流遠民失其利眾土司議夷土山成沃壤以改流中止禮璋繼爲之垂成而遷至是垂老解組太平民以舊役迎致禮璋欣然爲經畫夷土山建陀陵水壩蓄洩得宜皆成沃壤勞瘁兩年卒於工次

據順德志修以上順德

南海李徵爵分纂

番禺史悠履初校

番禺史悠乾再校

番禺金佑基三校

南海顏以湘四校

廣州府志卷一百三十二終

廣州府志卷一百三十三

列傳二十二

國朝

順德

陳蘭芝

兄純修

李麟徵

許廷進

周天柱

龍廷槐

父應時 子元侃 元任 元偉 元似

温汝适

黎簡

張青選

黃丹書

子玉衡

吳梯

李士信

楊貴

周維登

何太青

族子惠羣

馮龍官

黃迪光

劉萬程

蘇獻瑛

弟獻琛

張允良

歐陽顯

呂翔 弟培

楊龍韜

黃樂之 子統 經

潘楷 弟恂

蔡錦泉 族人如衡 羅傳球

黃崑

馬福安

羅惇衍

梁梅

李應田

周寅清

翁樹

賴瀛

何應志

鄧雲襄

國朝

陳蘭芝號馥亭順德人先世自香山來遷縣城兄純修字天眷嘗送海心大浪網聚龍田三百餘畝于邑備公車費縣令鍾蕙錫旌之蘭芝聰慧讀書領大義慨然有用世志求官京

師得判高唐地當七省衝繁重差絡繹刺史以委蘭芝櫛風沐雨事卒無誤州南舊有河夏秋水潦田廬淹沒歲屢不登蘭芝往閱形勢得潔河故道直至禹城久湮沒商于刺史得請院司檄使督濬役民夫及萬工半雨作為文禱城隍逮夜雨忽歇即露宿河干督夫分段挑濬工畢秋潦至而田疇無恙民名曰陳公河會城壞仍令專司版築命添造甃數十萬坎而瘞之州官以糜費詰曰城工保固十年例無開報今不預籌設有傾圯將燒造物料徵催四出是重費勞民也越年雨塌西隅得發甃以發自是才望蔚起金川用兵運東省協餉百餘萬出大散關風雪交作艱苦萬狀夫役無言止者蓋結之以恩也回任未半月復委搜緝王倫餘黨留心涇渭多所存活路見遺骸曰從逆者國法已伸掩骼葬骼法外之仁

也命所在檢埋軍功優敘乞假歸州民致粟釀酒攀轅送者數十里不絕歸杜門以書史自娛輯刻名人集十數種好施與歲入悉供剗刷橋梁道路用著有嶺南風雅據敬學軒文集順德志修

李麟徵號聞洲鹿門人九歲解文律為諸生與胡亦常蘇膺

瑞交善相勉作傳人乾隆己酉舉于鄉癸丑會試僕病篤不

欲終場僕涕泣促之入闈榜發遂成進士選祿豐令缺簡而

衝因俗敷化慎倉儲嚴驛政舊有書院乏膏火以充公雜項

撥置定為名額月給之士始知向學丁憂服闋改教選肇慶

學慨然曰向日簿書不獲與諸生講習使得師資今遂吾志

矣數年竟卒官端州人士多惋惜者著有聞洲文集孫大瀛

道光庚子副貢據順德志修

許廷進古樓人幼隨父僑欽州充龍門協馬兵乾隆三十九

年甲午拔硃州把總歷達濠營守備香山協右營都司補碣

石遊擊隨大帥福安康征臺灣以功遷大鵬營叅將既又從

總督孫玉庭防越南駐關外夜渡市球江殺賊擢龍門協副

將

賞花翎調閩安嘉慶初遷海壇鎮總兵官尋以琉球夷舟被

盜降千總案破並獲閩賊蔡牽首黨復守備遇颶舟沈受傷

用都司復翎歷烽火門叅將澎湖副將洋匪張保擾閩海廷

進方署掛印總兵勦捕被重傷遽卒年六十六卒後三十有

餘年史館行查事蹟立傳祠祀議卹如例子紹龍太平通判

卒無子襲停據司案修

周天柱號鳳臺龍江人乾隆甲戌進士知蓬州兩分校蜀閩

署守順慶先是川蠻蠢動專司運糧至是糧臺遞遭蹂躪調

軍前守礮賊至天柱知勢不免解印付賓佐馳報軍局誓以死守礮陷負傷適蓬民充別站糧夫者百餘人經破礮見之奮呼衝戰負天柱出僅得免戊辰卒于官天柱政尚寬平官溧水作堂曰補過以自警蓬居蜀北郭賊出沒為害天柱獲其魁與約而釋之遂斂迹于城開文明紫氣兩門建閒亭于望江樓下以課士兩科捷者五人蓬士向來所無也士民貌遺像于亭奉之

據順德志修

龍廷槐字春巖大良人父應時字懋之乾隆辛未進士合靈石協濟豫糧六千餘石優商採費為短站接運法紓夫力輒先期至地衝站供芻粟舊糜于蠹吏至卽革之歲省二萬李四黨至二百人通捕役害民責役自贖雪夜挈而抵其巢獲魁置諸法水旱壞民田宅禱神責已水遽退遂濬河流以工

代賑調首縣告養歸歲饑捐米倡賑九圖沿開縣故事派供官物偕城紳請禁遂革著有天章閣詩鈔五卷驛傳要規二卷賑恤紀畧二卷廷槐少穎而好學樸儉端正以廩生領乾隆己亥鄉舉丁未第進士館選授編修轉贊善大考三等左遷旋記名御史入直

上書房丁外艱歸築園奉母謝絕應酬出主越華書院講未幾辭去日手一編蕭然儒素嘉慶己巳洋賊張保焚劫內河村堡廷槐約鄉自設備首捐募勇築臺縣東拒賊禱於神得入土舊礮竭力防堵賊不敢窺籌備大良公費萬金凡濟貧養士拯荒皆賴焉順民田多在香山東海賊每擾及耕佃乃設容桂公約計畝抽銀為船壯緝捕費言于大吏著為例著有敬學軒文集子元侃號璧齋弱冠以廩貢就教職權乳源

教諭繼署德慶學有積生田數十畝匿于佃元侃丈實以租為士子省試費州人祀于賓興館嘉慶己巳海賊之役元侃以巡防遍歷濠汭濬其淤十八年癸酉領鄉舉捐員外郎分兵部八載歸元任號莘田以廩貢就教職司訓開平嘉慶戊辰鄉舉就中書丁丑成進士改庶常以編修督山西學

上猶詢及廷槐狀

褒獎至再元任感激兢兢以剔弊釐奸為務差滿擢右中允丁外艱服除還都遷侍講轉庶子大考左遷中允病未考差命主河南試還卒于官元任能文章工聲律善書畫摹倣元人皆逼肖著有詩鈔一卷律詩賦三卷元偉諸生太常典簿養親不出校刊廷槐遺書行之元似以刑部郎中選平慶涇

道據行述及敬學軒文集順德志修

溫汝适字質坡龍山人質穎異九齡解作史論年十六領乾

隆庚寅鄉薦甲辰成進士改庶常授編修丁巳入直

上書房擢贊善再擢洗馬侍講侍讀轉左右庶子遷國子祭酒太僕少卿通政使歷典廣西四川山東鄉試督學陝甘等陞副都御史己巳監臨京兆試臨場條陳降補太僕寺卿旋復副都御史癸酉擢兵部右侍郎甲戌以母老南歸未幾丁母憂哀毀成疾及痛聞

仁宗睿皇帝升遐扶疾就道兼程而進卒於江西吉安舟次年六十有七

上聞憫卹

賜其子舉人承悌進士因在

上書房曾侍

宣宗藩邸念其啓沃功也汝适視學陝甘時以甘肅寫遠藏書絕少乃捐貲多購善本置書院中藉廣諸生見聞奉

命讞獄福建山東研訊得情按問如律先是嘉慶甲子海賊漸肆劫鹽場燒艚船百餘汝适以爲言其後遂有陸運之議戊辰英人輕西洋欲奪澳門臺吏因循汝适言宜聲其帶兵擅人之罪集兵驅之必去果如其言己巳海賊入內河汝适疏言斷內匪之接濟宜先行保甲鄉自編查則接濟自絕海臺兵少宜令各鄉團練與臺汛互爲聲援礮臺勢難改建宜擇要添設礮樓皆下臺吏議行逾年賊窮遂就撫南旋倡修桑園圍言之大吏借帑金八萬生息以備歲修南順之民咸賴焉汝适入居都門不尚聲氣以大興朱珪河間紀昀爲師歛縣程恩澤壽陽祁寯藻爲友故學有本原生平無嗜好惟

以書卷自娛著有曲江集攷證二卷曲江年譜一卷攜雪齋

詩鈔六卷文鈔二卷其未梓者有咫聞錄二卷韻學紀聞二

卷日下紀遊畧一卷藏于家道光己亥祀郡鄉賢據阮通志順德志修

黎簡字簡民弼教人父居肆南甯娶妾生簡少慧悟十歲能

爲詩及繆篆摹印年二十五奉母歸益肆力于古貧未知名

既交同縣張錦芳黃丹書番禺呂堅丹書勸就試以擬石鼎

聯句受知督學李調元名遂起乾隆己酉拔貢丁外艱不赴

廷試生平足不踰嶺海內人士想望丰裁益都李文藻合潮

陽決以必傳簡故自慎不輕作應酬浙人袁枚負盛名探羅

浮至粵介所素習者爲招簡答書却之中年多病攝生之資

與衣食等築藥烟閣與婦梁相依于茶鐺藥鼎中暇卽吮毫

伸紙爲人作山水屏幃恃潤筆爲活畫由倪吳直窺董巨生

意盎然間攜客至羅浮望飛雲峯穿林入華首領畧活泉奇
脉或當烟波縹緲桃柳參差扁舟載酒泊村溪危坐繙卷故
下筆自見遠致蓋江山助人不必窮極萬里也書筆出入唐
晉成一家隸體則全宗石經不參他法一時求書畫者趾相
接意稍不合卽揮去緣是遂有狂名因自識曰狂簡頗不喜
人以張黃黎呂並稱蓋大有王後意也詩境幽峭援筆便成
絕幽鑿險亦有屢改尤妙者嘗自謂作元白詩不愁作不及
只愁寫不及惟久與唱和始信其言非夸也文雜莊騷不屑
八家軌範所著五百四峯草堂詩文鈔二十五卷嘉慶己未
卒年五十三卒後十四年國史館徵遺集取以獻此外尙有
藥烟閣詞鈔一卷芙蓉亭曲二冊據行狀五百四峯草堂詩
鈔文鈔四家詩鈔阮通志
修

張青選字商彝龍江人乾隆己酉舉于鄉挑發浙江知縣署
瑞安海甯州有實政嘉慶甲子補嘉善夏大水淹田廬民嗷
嗷待哺先賑後請遂多全活尋改餘姚己巳歲歉捐俸勸賑
調仁和首邑不以趨公廢事尋遷東塘海防同知署台州府
臨海奸民蘇占鰲斂錢惑眾制府將用兵青選慮擾民論占
鰲自首而薄其罪餘黨悉散擢守嚴州調杭州設局清查鹽
務遷督糧道兩淮運使調長蘆既視事官商畏服擢直隸按
察使調福建旋以三品卿銜補兩淮鹽政徵揚州舊俗奢靡
躬行節儉利病皆據實陳奏會新疆用兵以奏請緩解商捐
銀兩時方擢湖北臬使奉

嚴旨訓飭降授金衢嚴道引

見以原品休致居杭州尋卒青選七歲而孤母蔡教之成立

生平慷慨尚義周人之急道人之善愛才禮士敦本睦族為

近日所少云

據行狀聽松廬文集修

黃丹書號虛舟大良人天姿秀穎讀書過目不忘年十三應童子試輒冠其曹學使李調元見其詩嘆曰抗風軒之不墜其在丹書輩乎貢優行廷試歸築聽雨樓隱居養親若將終身丁外艱服闋猶素衣蔬食乾隆乙卯舉於鄉下第朝貴爭延致辭不就語人曰貧與富交則損名賤與貴交則損節大興朱珪撫粵尤器重焉晚官廣文所學彌粹士林尊之工書善畫與其詩並稱三絕與同邑黎簡友善間就呂翔梁元翀梁三峯論畫出所藏名蹟共欣賞往往盤桓旬日其風趣如此著紅雪齋詩鈔八卷文鈔一卷胡桃齋詩餘一卷子玉衡字在菴弱冠餼於學嘉慶辛酉拔貢七品小京官丁卯中順

天舉人辛未進士館選授編修己卯補浙江道御史玉衡質敏而性孝方會試心動遽歸而父已卒哀慟至不能步弟玉衡亦舉京兆玉衡性友愛弟病夜常十起兩分校順天鄉試所得多名士入臺首揭粵東督撫吏外馬館之弊

旨下查禁已已海賊入內河時方家居倡議於縣東江頭嘴築礮臺防堵賊不能入少承家訓詩文皆尚正軌工書自御史假歸病卒廣信舟中著有安心竟齋詩四卷館課二卷

通志順德志修

吳梯字雲川年七歲為制義有奇氣嘉慶辛酉領鄉薦第一元墨出人爭傳誦九上春官皆報罷以方畧館膳錄議敘得知縣部選蒙陰山東瘠邑也聞者為之色沮梯笑曰我輩志不在溫飽甫得一官已計肥瘠耶遂之官至則令鄉舉齒德

士爲公正給戮記俾防盜除夕漏下忽有距城四十里某公正求見以巨盜驟歸告梯投袂起督捕役出合公正爲嚮導突馳盜所盜方枕刀臥倉皇就縛搜獲違禁器物甚夥嚴訊堅不吐實威以極刑大作鼙聲蓋邪教也逮訊其婦供夫原籍某縣多年作賊比移查而犯庾死獄中蓋林清逆黨云縣當孔道額設驛馬每年舊馬已瘠新馬未到換用民馬官換一民供十于是民病且換者率疲駑不免誤差于是而官亦病梯至卽張示革除他如諭民種茶種樹諭借穀諭除糧催皆有實惠鄰邑蝗發獨不入蒙境民以爲瑞調濰縣縣濱海圖利者議開港招商謀定聞諸官梯思濰與海通時防賊擾更開口子奸民媒孽後患不可勝言拒不准復條陳利害立檔永禁邑多水患相度形勢浚河修堤患頓息卸任之禹城禹城歲漕六千餘石用漕車六百餘輛漕車外復創薊車名目添派五十餘輛百姓用困梯甫下車卽將薊車名目裁革與民鬻物悉按市價平給至聽訟鞫囚尤不敢孟浪率斷某縣嘗有劫案奉

旨限緝俄而贓賊並獲梯與審焉未動刑賊已吐實獄成獨不畫諾上官詰責梯曰贓少而不實不成信讞草率了結恐膺重譴上官益怒辨論間河東果解到全獲贓犯乃喜曰吳令直老吏也擢任膠州年饑穀貴梯勸捐雜糧二千餘石菽一糝五稷秣各二攬和爲半價分糶復平糶倉穀萬餘石穀已罄而穀價愈騰時距麥秋尙遠州民嗷嗷待哺適得靈山書院山長豆餅濟飢策卽諭豆餅行截留三萬片片重五十餘觔共得一百六十萬觔足敷五萬人一月食于是城鄉分

廠出糶派官經理飢民爭買糧價頓平所得餅值悉歸諸商故民弗飢而商力亦弗耗梯去任後膠州復飢踵法行之州民無餒者郎中某巨富卒無子妻陳氏擇族子爲嗣遠族舉人某私結郎中族叔強以己子入繼氏訟于官梯廉得實斷令立賢而親者爲嗣又慮嗣子爲某舉人中傷也嚴諭其族紳謂陳氏母子萬一有意外惟舉人與族叔某是問氏母子卒無恙再擢濟甯濟有李澍最富上官欲彌補鹽餉牒州取充鹽商梯念逼勒充商易致破家牒留不發自爲稿由覆力陳勒充之弊懇奏請永禁上官悟據情轉奏李得免以千金爲壽力却之卸任再餽仍弗受梯凡莅任與差役約因犯罪重輕爲賞錢多少差票限日收繳借票毒民則革役反坐命盜案須詣勘者卽以夫馬自辦批于呈尾故下鄉相驗民無

供應之累任某縣時有犯遠颺爲鄰省所獲其姓名籍貫案由一一不爽旣認鄰省大案正法移東撫飭縣銷案梯以道遠慮有賄囑代認案存未銷數月後果在本境緝獲本犯縣有莊丁某得罪王人變姓名逃匿鄰縣其母以與莊主女姦殺兒沒屍控官其女欲自盡者數矣梯莅任院司勒限完結屢訪無確據已而沈思莊主之女不到案則案不結脫不實到案後畏羞自盡汚名節且殺人非慎憲之道因諭莊主懸千金賞購莊丁不數日獲之誣控得白莅官多年聲藉甚在蒙陰時江南侍郎秦瀛入都過境語梯曰吾在籍聞蒙陰人稱子爲青天今識子之心矣在禹城方伯朱桂楨薦于巡撫巡撫方以浮言撤梯任屬朱矚之至濰縣縣民莫不嗟歎以官之去濰爲恨方伯愈信之然位終不達也枕經蔗史學問

槃深古文宗昌黎詩祖少陵江南盛子履選粵東詩獨推梯與黃玉衡張維屏等為粵東七子解組多年乃卒年八十三

據采訪冊修

李士信原名廷官號白山鹿門人工書善畫蘭為黃丹書黎簡所重嘉慶戊午鄉薦戊辰大挑一等分發陝西到省半載即丁內艱回籍總理鄉堡事遂不出已巳海賊張保入內河士信奉檄先捐貲倡堡內辦團練募勇鑄砲防禦甚密閩堡賴焉生平見義必為方其續娶也所聘容奇魯氏先經許配同硯某者友亡而再許聘士信不知也來歸之夕諸娣頗有漏言細詢始得其詳慨然曰此余先友妻也今忍以其妻為妻乎因謂魯曰父母為汝改適者禮也余不忍以汝為妻者義也汝能守節我能妹汝若何魯感其義慨然諾之即構屋

別居養之終其身同族有女因貧被拐流落平康士信一見

即贖回其勇於行義多此類也中年目眚不復理鄉事晚乃

復明又數年而卒年九十三弟仕昂字容彰邑諸生亦享高

壽咸豐元年

恩賜副榜卒年八十三據采訪冊修

楊貴順德人少有勇畧由行伍拔補新塘營外委嘉慶三年

隨征教匪達州旂山力戰陣亡奉

旨祀昭忠祠據順德縣志修

周維登玕涪人七十老農也少負膽氣精拳勇藏箭于袖手

伸箭出無虛發嘉慶十四年已巳海賊張保內擾諸村堡各

團練以禦一時壯士先後死賊者黃連扶間陳村雞州羊額

皆祠祀焉平步則李珍寶何松光香山鍾阿妹扶間則廖鳳儒廖廣儒廖新移廖茂和陳村則歐連魁黃長餘

馬吉黃鎮中麥昌聯歐瑞錦歐福聯韓東陔林有羅州而維則陸進高蘇強盛李長榮羊額則何祥盧福堂皆祠祀而維

登戰最勇死亦最烈玕涪地環海賊艤舟登岸見者股慄羣奔維登憤甚白髯如戟執挺袖箭而出扼賊于村旁小橋村之要路也有兩少年相從夾其左右賊羣至不得過格鬪良久箭槌所及無不死且創賊仍不退蓋擁至少年色沮維登叱之曰豎子保爾命去毋累我兩少年既並竄賊來愈眾維登氣愈厲箭盡槌折退負一短墻持半段棒獨當三面賊慮終不可入乃密掉小舟繞出其後礮發洞墻而維登死死猶屹立不仆賊寸磔其屍遂擁入擄男女千餘人去其女亦歿

賊死據順德志修

何太青號蔡閣羊額人舉嘉慶甲子鄉試己巳成進士由庶常散館出合於潛案無留贖董濬西河功速而費省調德清

有貧民數十越界售鹽營弁偵獲以大股私梟通揭請窮治太青廉知肩負之名不相謀也力爭于上官得薄懲再調仁和事益劇而力益勤巡撫深加倚重薦擢嘉興海防同知承修駐防戰艦會病愆操期比竣已奪職方請復遽丁外艱歸初與吳人顧元熙族子何惠羣同館選在德清延顧王書院授其子經未幾顧來粵督學其子以歸試行止請曰士入學何必藉人口也其孤介如此何惠羣號介峯質絕慧讀書如夙習從太青學舉甲子鄉試第一又與太青同成進士自庶常改新昌令治事簡脫不尙催科丁生母艱歸垂二十年杜足公門侯官林則徐典試江西惠羣以房官見知及庚子則徐督粵屢招僅一見其年遽卒惠羣師浦城陳壽祺見聞賅洽為詩亦不傍前人門徑云據順德志修

馮龍官字孟蒼古樓人父瑜諸生幼即教以小學上口能解
 說年十二補縣學生先世籍庠序者至是七世矣甫冠作汗
 漫遊沿楚入蜀所至與名流講求問學見聞既廣又得山川
 之助業大進歸則聚羣書窮日夜研究既而父歿家益落授
 徒會城縉紳聞名造訪杜門不見布政使南城曾煥方負重
 望介其弟子陳曇延致龍官卒不往汀州伊秉綬之守惠也
 癖嗜龍官書及所撰著顧未獲晤迫惠州盜發伊得罪入獄
 龍官青衣小帽就獄中與訂交總督阮元修粵東省志馳書
 以招固辭生平尚風節敦古處慕南海鄺湛若而加以檢束
 為文循正軌講體例考據精博購書得善本手裝而跋其尾
 尤喜金石至羅定搜龍龕巖文古刻遂出子尚縣諸生

據順德志

黃迪光字棐亭吉祐人嘉慶戊辰舉于鄉己巳成進士就教
 職銓高州府教授士慕實學上官延王高文書院講生徒接
 踵多成名府城舊無育嬰堂迪光申請大吏率諸紳籌貲創
 建巡撫朱桂楨聞其賢調粵秀監院粵秀為合省書院地外
 郡貧士多人居至即清釐積習流品一清上官延訪利病知
 必盡言道光十三年西潦浸淹村落附省近縣失食委理會
 城賑濟廠籌畫給散不辭勞瘁時順德鄉自為賑迪光復捐
 俸為鄉族倡以吉祐數受水患建議築圍八百餘丈役作而
 迪光病以版築付同鄉麥時泰麥耀祥遂卒後二人卒完其
 役鄉里賴焉

據順德志

劉萬程號星軺龍山人嘉慶戊辰鄉薦庚辰進士選庶吉士
 散館籤分刑部主事道光九年派辦秋審補安徽司主事擢

本司員外郎遷河南道御史首疏潮州械鬪頂兜之弊請飭大吏嚴懲累千餘言潮人德之充順天武鄉試內監試官故事塲中卷先選取雙好字號額未足方取單好字號是科八旗漢軍順天等府已中者有單好三十三卷其未中者有雙好三十四卷萬程查與定例不符單銜具奏有

旨查議其遇事敢言皆此類也旋署長蘆鹽運使先是商疲課絀蚩緣彌補積欠常至數十萬萬程至剔蠹釐奸屏絕餽遺商人畏憚不滿月而積逋以清十六年補兩淮鹽運使淮鹽運行六省而除例食本土鹽外其餘或因場近而食賤或因鄰灌而透私所真食淮鹽者不過十數府而已而鹽課自嘉慶二年後歲額至八百餘萬課愈多而欠愈重道光五年至九年五次清查積欠至五千七百五十餘萬兩而鹽引歲

僅運其半遂至墊欠挪移百弊支絀十三年裁鹽政歸兩江總督管理淮中正雜內外支欸稍省而江廣各岸私充滯引轉運仍艱且胥吏奸商之規費久難禁革數十年來未有能振而起之者萬程甫下車卽圖整頓裁浮費緝私梟杜糧船夾裝懲鍋戶侵佔所以紓商力固商本者靡不周詳故自冬及春商人皆樂于輸將計庫儲已積至三百萬有奇願奏銷屆限將以徵收全完定期奏報而各商以岸貨未回萬難依限完繳萬程日夜憂思忽染痰病旬日內飲食無時言語恍惚一夜閉戶獨寢稍聞呻吟聲啟戶視之卒矣卒之日同官來弔者入室見木枕布衾而外更無他物莫不嗟歎焉

據順德志

蘇獻瑛號愛石嘉慶庚午舉人性嚴正一時禁絕賭博每身

率丁壯入賭局縛出無怨言察其貧而初犯則賙使改業以親老弟官外遂絕意會試弟獻琛號韞石嘉慶戊辰進士任婁令未幾以親老歸與兄友愛事必稟而行授徒會城不入公府林則徐督粵以書招之謝不往少師事陽春教諭陳紀景其學行歿合貲為祠祀之終身不忘

據順德志修

張允良字月池龍江人初順德有彭睿勳以草聖馳聲其後則薛伯符摹硤序無慮定武頴上經其手者偏旁格段不失而各得其神致所傳多綾本蓋明末調濃墨施之綾幅墨不甚瀋至此尙沿而用之也允良書法並宗虞褚尤近河南能擘窠大書一時額榜多其蹟縣學明倫堂扁卽手寫之佳者與堂屏楷寫聖經之出黃丹書者稱二妙焉

據順德志修

歐陽顯字晦崖三華人專意學書自晉迄宋分途而各求其

門徑楷行皆盡其妙家貧僑會城為人書屏幃士大夫交口揄揚名滿嶺海將軍福增格來粵喜書畫多與粵會名流接數招之不見為介者問其故以軍府峻不欲布衣入將軍聞卽為援例捐國子生相得甚歡所致潤筆豐盈豪取手散頃刻輒盡時海宇承平官粵者多鑒藏購收名蹟恆請定焉當其空匱往往摹臨一二古帖善裝而售之見者酬以厚值藩司吳俊嘗以五百金購得一卷酒後擊節歎賞越日審視召而指其瑕蓋顯所為持以易費者也遽詢所自遂以實告與張錦芳黎簡友善張嘗得一黃文節卷攜共觀之亦顯所摹者生平每倣古蹟必杜門謝絕朋從萃神諦視良久乃下筆一本置紙下一本對臨故規模合而精神亦逼肖所藏閣帖祖本黎時假歸歎其書法有自臨唐王居士磚塔銘刻諸石

毫髮皆似焉

據順德志修

呂翔號隱嵐大良人先世遷自容奇于碧鑑海旁二株松下築堂池以居顏曰詩境性寡默而喜交遊少即能摹擬見古名蹟必鈎藏焉畫時輒取較其大小遠近之度以為繩尺故所作蹊徑動與古合蓋天分絕高又能精心師古烟雲變滅氣韻生動非凡手所能及也聲華既播嶺北縉紳得其片縑珍同古軸往往折節納交有奉使冊封琉球者聘以重幣會病不果往先是畫苑有南奚北宋之目謂葆淳與岡也既而汀洲伊秉綬來粵見翔畫遂易之曰北奚南呂所為花卉專學陳道復叅以錢坤一法與其弟培對案潑墨膠山礬海間商量位置怡怡如也所居與梁元狷余鳳比鄰復與黃丹書黎簡梁樞為忘年交相與談論六法無間旦夜嘗襍被訪其

友梁禮觀于西樵住白雲洞屢月對坐瀑下頓忘朝食自言進境以是始云培字荔帷幼聰慧能讀工詩賦篆隸尤精刻摹印章聞桂林山水甲天下沿牂牁而上至太平遂寄籍督學錢楷拔為學生使從襄校既久不得志乃北遊期有所遇
恭植

仁宗還蹕淀園以

御製勤政殿箴語刻一印復恭錄

御製咏物詩按次第畫其後裝冊進焉蒙

賞緞疋南歸登嘉慶己卯賢書下第卒生平嗜酒醉後作蘭

竹頃刻百紙能曲盡風露情態短槍密劍秀從勁生其他花

草能與兒競爽云

據阮通志順德志修

楊龍韜號凌雲容奇人尚義有膽畧援例干總補肇慶協左

營右哨歷署廣州協左右營護理前山營守備道光十二年壬辰連州八排獠不靖調往進勦奮力向攻力竭陣亡給雲騎尉世職恩騎尉罔替祀廣州昭忠祠子兆榮襲先是龍韜瀕行語弟聖昌曰丈夫志在立功此去誓以身殉得還見汝幸矣執手揮涕而別至是果捐其軀

據順德志修

黃樂之號愛廬大良人嘉慶癸酉拔貢以小京官籤分吏部舉道光壬午鄉試補稽勳司主事擢文選司員外郎丁艱服闋補江南道御史署兵科給事中擢工科給事中樂之居言路隨事條陳其最切要者有培養廣東元氣六款一曰捕務勿廢弛二曰案件宜速完三曰錢糧禁浮收四曰義倉宜專設五曰營兵宜訓練六曰權稅宜均平累數千言指陳宿弊如燭照數計所上封章多議行授貴州遵義府知府樂之到

任見轄縣不知蠶桑但種青桐養山蠶蠶熟結繭又爲烏雀啄害乃刻農寶要書立賞格申勸買棉子教之樹藝並製紡織器具分頒村莊厥利甚廣山王坳私開銀鑛親往逐之以巡撫賀長齡薦癸卯擢浙江杭嘉湖道轄缺有海塘工務最急其營兵以備修築不習弓箭技擊樂之延師訓練懸賞操演兵皆可用總督劉韻珂巡閱至大加贊賞屏絕苞苴陋規一無所受總辦洋務善後局紳董送薪水亦不受其清介如此擢山東鹽運司調江西吉南贛甯道三十年廣東英德土賊滋事境連南贛巡撫陳阡檄往巡防時賊爲粵兵所逼將踰龍子嶺入境適都司遮克敦布領兵至令馳赴龍子嶺嶺有兩路乃坑其一並兵力于一路設伏以待夜未晨賊大至伏兵鎗斃數賊賊不得過會粵兵至夾擊斃賊無算捷上

賞戴花翎咸豐元年擢福建按察使調浙江按察使時髮賊據金陵鎮江揚州失守樂之督師守平望鶯脰湖江督怡良奏署浙江藩司以時事多故恐誤軍務遂以老乞休卒年八十二子五人長統字伯垂道光辛卯順天舉人庚戌二甲一名進士選庶常散館授編修充國史館武英殿協修功臣館纂修咸豐改元髮賊熾承

詔上書論兵事條陳皆切時務章人甫浹旬卽有貴州學政之

命故事庶常新留館例不與考蓋

特恩也統曾隨父任遵義稔知黔省文風不振甫下車卽彙選古今文詩賦刊刷隨棚分給甲寅冬按臨遵義畢路次新城土賊突至倉卒受石傷恐誤試事奏請開缺枉道往山西

河東道署調治時弟經任河東道也乙卯病痊回京丙辰以疾卒年四十五子經號確泉舉道光甲午鄉試第一甲辰成進士改庶吉士散館授編修充國史館協修纂修主試雲南所得多翹楚士差竣補江南道御史轉掌福建道前後疏凡十九上其切要者如散脅從以孤賊黨清江路以收金陵厲嚴斷以肅紀綱節財流以裕國用皆有關國計而薦前輔臣湯金釗督臣林則徐一疏尤爲當務之急其畧曰致治之本在用人用人之道貴知要此帝王馭天下之仁術也

皇上寶籙初膺勤求上理選賢輔德實爲急圖伏見前協辦大學士湯金釗年近八旬精神強固品端學粹海內目爲正人洵昭代之良臣百寮之矜式倘再登朝列必能殫心啟沃上贊

聖躬嘗考唐臣裴度年七十餘罷政後復入相宋臣文彥博年八十餘以使相致仕元祐初司馬光以宿德元老薦復拜平章軍國重事五日一朝一月兩赴經筵恩禮甚渥今湯金釧齒德俱尊較之裴度文彥博差可無愧伏乞

皇上

召問政治得失采唐宋故事起置左右仰裨

主德且使天下臣民知當今崇尚正人自然觀感而興起其益多矣抑臣更有請者國家既取德望之臣以爲輔弼尤不可無才猷出衆之士以熙績釐工前任雲貴總督林則徐總理庶務精練過人持躬亦厲廉潔上年病假回籍聞近來日就痊愈且年僅六十餘歲精力未憊伏乞

皇上令其來京酌量留用其人吏治熟悉要事得以面詢該

員念累朝眷顧未有不感激圖報者也疏入報

聞甲寅後京師戒嚴助理巡防擢任河東道經至任事無鉅細必親裁鹺務頓起復治部內教養之事百廢俱興屬吏有才者上名大府拮据則解囊濟之皆感激樂爲用俸滿當遷大吏奏請留任經悉心籌畫著河東鹺務錄一卷鹽池記一卷凡大綱細目變通補救之法悉具擢山西按察使臨行以前諸商所送陳設萬金封識納于庫作爲羨餘僉謂此可取爲道途費經曰不可吾攬歸私橐所裨幾何異日地方有急公帑不名一錢後人從何措辦其深識遠見多此類也晉省時送者互數十里士夫作爲歌詠以頌去思庚申三月抵任清理各案體素羸瘠道途感觸風霜一病遂卒年四十七經與同邑羅惇衍好講心學而立身有本末與援儒入墨者不

同身後撫臣黃榕吉學臣黃鈺奏請入祀河東名宦報

可而里民有私祀于家者擬以龔黃召杜可無愧云據采訪冊修

潘楷號小裴冲鶴人弱冠以案元進庠嘉慶戊寅舉人道光

己丑進士籤分刑部派總辦有能聲丁艱回籍值洋氛不靖

倡舉團練鄉里賴之服闋回京補主事升員外郎充坐辦減

等處升郎中適宗室緣事發審惇親王力維宗法意在嚴懲

楷按例議罰王不悅楷曰法如是足矣其持正若此京察一

等擢雲南迤東道道地雜漢回互控積案雖絲棼盤錯咸研

究端緒務得實情以薦

召見回任候升捐輸軍餉

嘗戴花翎咸豐三年秋會合省東軍平東川馬二花張士林

二寇四年春粵西賊至擊敗之七月加按察使銜五年秋彝

甸東川回匪披猖帶兵懲辦歲杪抵省適廣西州彌勒縣匪

陷城六年正月馳勦殺賊三百餘人餘皆竄散擢貴州按察

使未行而臨安府厥練與回人互鬪事起漢殺回男婦干計

回復圍省城燒民居數萬戶又大理府城被陷軍書旁午上

游倚楷為臂助特奏留辦軍務遂署滇藩時省城被圍久六

月總督恆春雉經死巡撫桑春榮病謝事新任吳制軍遠阻

曲靖不得至兵餉交責於藩司庫儲既空糧道又絕米八飭

值銀三兩楷捐米萬斤並藉捐項滙項以濟急帶親軍百人

晝夜駐大東門城樓與士卒同食雜糧家人憐之偶炊米進

投箸而起故危城卒以保全及回氛稍戢餉絕兵譁自撫至

縣搜括殆遍惟藩署相戒勿犯謂此久駐東門與我輩共甘

苦者也九年春人

覲以足疾休致歸主講鳳山書院二月遭疾逾年卒年六十
九弟恂字訥如廩貢生性端謹鄉人咸重之舉孝廉方正以
軍功加光祿寺署正銜亦年六十九卒

據羅惇衍撰行狀修

蔡錦泉號春帆龍江人幼聰悟成童補弟子員試輒優等南
海庶常謝蘭生賞其文妻以女名遂起道光乙酉拔萃辛卯
鄉薦第一壬辰成進士散館授編修甲午充順天鄉試同考
官本衙門撰文入直

上書房丙申提學湖南選拔得人稱盛秩滿以事被劾落職
捐內閣中書歸主講端溪書院偶宴客暢談客散遽卒族人
如衡字湘生嘉慶己卯進士館選授檢討與弟如萃同學以
友愛著未幾卒羅傳球字鳴庵大良人少慧善文工書求者
無虛日與錦泉同舉鄉會試同官編修而性恬退歸養後道

遙于文酒間者十年丁外艱服闋還都丙午分校順天鄉試
數年卒于官

據順德志修

黃崑號崙山陳村人嘉慶丙子舉人庚辰進士選應城令調
浦江至即修文閣舉賓興歲歉勸捐平糶浦江山縣水陸商
旅不至而輸賦以錢會銀價貴多賠或勸謀于殷戶稍加其
耗崑曰賠解止損官議加則害及百姓收錢如故以虧額落
職邑人思所以報乃公祀于六侯祠更額曰七侯未幾竟卒
于浦

據浦江七侯祠碑順德志修

馬福安字止齋道光己丑進士選庶常散館授四川犍為合
丁內艱歸癸巳潦荒先後捐八百金賑其鄉釋服棟發福建
署順昌縣盜劫長汀兵餉捕之無踪福安獲大猾劉三妹者
使偵獲十一人案遂解權詔安去十一人皆反供落職既而

上官知有王者為請開復署漳浦俗尚械鬪邱梁兩大姓鬪輒不解福安挈役數人親赴諭以利害兩造遂散受傷死者當時斷結不擾事外一人其後奉檄往漳州道出詔安沿途香燭迎送巡撫疏薦擢知六安州丁外艱服闋未赴卒福安學有根柢阮元創學海堂以經史詩賦課士舉學長八人福安與焉著有止齋文集鑒古錄據順德志修

羅惇衍字兆蕃號椒生始祖綱宋紹興間自南雄州珠璣巷遷居南海太良村後改隸順德遂為順德縣人曾祖禮來本生曾祖禮綿乾隆五十九年甲寅舉人吳川縣教諭祖高順德協左營外委嘉慶間出征四川達州禦賊白巖山陣亡父家政嘉慶十八年癸酉舉人五品銜高州府教授皆贈光祿大夫母李氏有身得瑞徵及生紅光滿室甫週歲岐嶷異常

兒十一歲學為文長老驚其宿慧年十六補弟子員道光十四年甲午舉于鄉明年乙未成進士改庶吉士十六年散館授編修十七年

命視學四川旋以年輕恐未能周悉老到仍留京供職二十二年充四川鄉試副考官歷充國史館協修纂修文淵閣校理教習庶吉士本衙門撰文二十三年

御試一等擢侍講充日講起居注官七月充山東鄉試正考官轉侍讀二十四年擢侍講學士充咸安宮總裁二十五年充

恩科會試同考官五月擢通政使司副使九月擢太僕寺卿二十六年督學安徽以白鹿洞規課士士多化之二十九年九月陞通政使次年正月

宣宗上賓惇衍不茹葷酒者累月

文宗踐祚疏陳法

祖訓以端本善俗畧云臣恭讀

聖祖御纂性理精義此書理賅詞約內聖外王之功無不畢備願

萬幾之餘講習討論身體而力行之至察吏安民羣僚無所售其欺則莫若

世宗硃批諭旨此書所載臣工奏摺凡二百二十三人皆恭錄

批答使共知所陳之得失敬祈

皇上將此書日閱一二事凡督撫所奏有能深謀遠慮措置得宜者固蒙

褒答若不實不盡及飾詐懷私者亦一一爲之

指示周詳庶大吏知所做戒則所以飭官常而維邦本者實繫於此另片奏請

諭部院大臣各舉所知以備京卿及講讀之任並請敕內外諸臣指陳天下利病無所忌諱得

旨嘉獎咸豐元年充福建鄉試正考官冬十一月疏請崇儉禁奢以省物力謂京外官民應遵典禮違者戒飭庶人心知警共還醇儉查道光八年曾刊刻簡明規條使百姓知所恪守乞

下禮部就會典通禮二書撮其簡約常行者以爲條教之式報可二年充會試知貢舉八月署吏部右侍郎十月充武鄉試正考官十一月以日食疏請

廣州府志卷一百三十三
嚴飭廷臣實力修省畧云伏見

皇上御極以來惓惓愛民孳孳圖治在廷諸臣非不循分供職而遲回慎重之意多奮發振興之意少因而莅官行政鹵莽粗疏之弊少遊移遷就之弊多廷臣首鼠兩端疆臣亦互相推諉大員委蛇容悅屬吏亦專務趨承請因日食修省嚴諭廷臣將平日諉卸取巧之積習悚然改悔毋貪戀祿位毋顧惜身家事可行則行毋泥成例費可節則節毋避眾怨人可舉則舉毋限資序法可改則改毋憚更張庶挽頽風而臻上理又疏請將本年冬至慶賀之處停止均報可擢都察院左副都御史三年正月稽查左翼宗學二月擢刑部左侍郎仍兼署吏部右侍郎先是戶部因軍需煩重令京城舖戶報捐一月房租為權宜周轉計惇衍疏言戶部所云在房主恆

產取租一月原無大損但其中須分別房主有孤兒寡婦專藉數間房屋租錢養贍者今一律徵收所益無幾而勞獨無告之人或無以餬口則所損實多非所以示體恤也即各舖戶生理有業甚賤租甚微者若概行交納于經費終無大補

請

飭下戶部分析收免妥為限制疏入報聞未幾復奏請停罷四月疏言閩粵海船向帶貨物向天津售賣道光間前江蘇撫臣李某會由上海招商採買白糧數十萬石赴天津交易繼乃發價短少加以胥吏剋扣米既在船不能不賤賣以後遂裹足不前現在閩粵海船均願運米赴天津乞下戶部預定價值由官發出不假胥吏一立章程即咨該省出示招運俾商賈有所利而倉廩益有餘于國儲民食均多

裨益

交部議行又疏言自豐北決口瀕河一帶悉成澤國江蘇之豐沛銅山碭山邳宿遷山東之魚臺濟甯金鄉嘉祥滕嶧被災最重屍骸遍野遞相枕藉請由東南兩河總督督率所屬地方官擇地殮埋其流離轉徙未填溝壑者量爲撫卹資送報可自賊氛大熾江甯失陷賊復北竄京師爲根本重地守禦之法尤宜早備乃疏陳四事大畧京城內外宜若何紮營防衛官紳士庶宜若何聯絡稽察糧餉宜若何籌備足食用兵弁宜若何遣調以壯聲援累數千言

上是之卽

命辦理巡防事務惇衍慮賊近津沽無業遊民易于投賊密請妥爲慰撫使人心固結無隙可乘疏入報可十一月調補

戶部左侍郎兼管三庫事務仍兼署吏部右侍郎往通州清查通濟庫欸十二月充實錄館副總裁五年四月巡防事竣賜宴勤政殿

特賞如意福字故事京官非一品及內廷行走無頒給福字者惇衍以侍郎得之異數也七月疏言江北大營自雷以誠定捐釐助餉章程經勝保奏請推廣由戶部核議並無流弊奉

旨允准在案今江南各府亦仿照江北辦理兩年以來商民踴躍捐輸于軍餉不無裨益近聞行之漸久流弊滋多卽如泰州仙女廟爲商販總匯東南通三江營西北通二道橋其中團練盤查等局七所爲商船必由之路弁兵以盤詰奸細爲詞多方阻滯官紳以稽查偷漏爲說刻意刁難概樹捐釐

賦餉之旗得遂假公濟私之計巧立名色暗逞侵欺商船初到挨次停泊索掛號錢兵役上船驗視貨物索查船錢稽查已畢蓋截放行索灰印錢稍不遂意卽以不服盤查藉詞窮究視商販之肥瘠而魚肉之是以商販小民不以大營之捐釐爲苛而以沿途之盤查爲苦捐釐不過百分取一沿途盤查則不啻十分取其二三自沿江用兵以來富商大賈早已挾資遠徙其冒險而來者不過逐什一之貧民關鈔之外卽助釐助餉已屬一時不得已之謀豈容不肖官紳據爲利藪若不嚴絕弊端恐商民虧累轉與助釐助餉章程有礙請飭統兵大臣嚴飭各路不得藉端苛索其非盤查喫緊之地員弁概予裁撤不惟節有用之費亦且少生事之人至南北往來貨物應照奏定章程于各屬銷售之地按數捐釐若貨

物非當地銷售者則南有蘇關北有揚關已輸關稅不準加收如此則商困可甦招徠可廣而軍餉亦藉資充裕矣又疏泰州仙女廟米石暢銷較之往年加倍皆因鵬船搬運所致鵬船者艇船之腳划船也該船自仙女廟源源販米以艇師軍食爲詞每乘黑夜私販于賊大抵該船水手皆海盜之餘趨利若鶩罔有人心統領艇師員弁恐激成事端明知故昧是艇船名爲應募暗售奸欺久而無功實緣于此臣愚以爲賊之接濟不斷則用兵無已時若不嚴禁販米之鵬艇亦無從斷賊之接濟請

飭督帶水師大員按照艇船人數計口授食官爲糴米庶可杜接濟賊人之弊又聞鎮江潮勇流毒無窮該勇等口糧最多近日竟有賤值僱人冒名頂替其眞潮勇三五成羣攜帶

腰牌號衣自丹陽以至上海假查拏奸細爲詞訛索商民無所不至又包攬貨物重載揚帆過關地方官畏其克橫不敢過問商販恐其劫奪視爲畏途若不加以嚴懲必至留爲後患請

飭督帶潮勇大員嚴禁該勇等冒名頂替至沿途地方官遇有不奉文札假冒潮勇者許其扣留解往大營查究庶可消患未萌而善良得以安堵九月丁父憂八年服闋適廣州有洋人入城之事

詔偕太常卿龍元僖給事中蘇廷魁督辦鄉團駐花縣改授團練大臣所陳疏皆秘密外無知者十一年七月

穆宗登極奉

兩宮皇太后垂簾聽政擢授都察院左都御史

詔入都元年七月抵京擢戶部尚書履任後卽具疏陳典學敦孝任官愛民之要充順天鄉試副考官惇衍念庫款支絀各項款目截至本年八月僅存實銀七十餘萬兩而自九月至歲杪應支之數尙短二百萬有奇非設法籌辦貽誤匪輕疏請各省應解各款予限兩月明定遲延處分以儆膜視由是度支始充在戶部七年所儲多至數百萬兩十月

賜紫禁城內騎馬十一月疏陳畿糧短絀情形云江浙各省迭經兵燹漕運無以轉輸京師秬米一項向全恃購買甲米實之倘倉米不能接濟卽無從採辦以畿輔之廣待哺者億萬一旦告竭害可勝言耶現在庫款不足固難于京餉之外更糜鉅款則莫若令民間自行交易之便然米糧不至天津民間何由交易各省俱有重稅米糧亦何由徑至天津况捐

釐兼及穀米尤爲有損于民查西南均產米之地雖偶值失陷其米尙有出口者而完善之區更無論矣但一經出口卽種種留難是以運轉不及遠方而京師無以應急請飭各省督撫出示招商採買販運由海至津普免稅課商人旣無所苦自必踴躍爭先而近畿一帶稍獲蓋藏京師有可恃而不恐

交部議行十二月充經筵講官二年三月署都察院左都御史初廣東高州府屬之信宜縣爲賊所陷將及三載郡城時時戒嚴肇慶府屬之恩平開平鶴山高明等縣土著民人與客籍互鬪土民大遭蹂躪兼以各處股匪蔓延勢復岌岌惇衍以爲不得將兵之人不能收效旦夕於是疏請專任大臣分道勦辦地方次第肅清二年正月疏請

整飭倉儲畧云防守之要莫先足食州縣設倉積穀或隸于官或創于民法制不一而承平之世以備歲饑有事之秋以資勇饗立法最善用意亦最周漢臣賈誼所謂積儲爲生民之大命有由然也軍興以來賊至而棄城者所在多有推原其故總由米粟空虛遇變無所倚賴不能固守以待外援食固不可一日而無備矣卽如廣東廣州府屬道光間紳民捐資在省城設惠濟倉因咸豐四年賊起前督臣提用倉穀價四萬兩籌辦紅單船復提用七萬兩以供支欸原捐穀價幾於摻取一空此外各州縣存有倉穀亦多變價充餉其尤甚者花縣先經賊破倉儲已空事平之後紳士捐資買補亦于咸豐八年札令變價百姓不服始行中止在疆吏籌畫計窮不得已而爲此獨不思比戶小民尙且不惜資財爲未雨綢

繆之慮地方大吏豈宜漫無決擇爲絕流漁括之圖耶現在廣東經費支絀似難責令買補但未經動用者尤當曲加愛護以重根本而固苞桑伏查咸豐元年新修戶部則例載常平社倉督撫任令州縣侵挪短缺上司及州縣一併從重議處又載常平倉穀如遇災詳請借給借戶須係農民取具的保無災年分不準出借違者嚴參治罪等語然則非賑饑不能出糶例案本甚詳明現在各省奉行不力因倉庾稍有蓄積卽思挪借以挖肉醫瘡之舉失餬口就食之資一旦有事每易淪陷應請

下各省督撫無論官倉民倉未動之穀不得變價提用至于倉穀已缺紳民捐資彌補者尤應加意保全庶足以順輿情而備緩急

詔所司據實覆奏時湖北江西已肅清安徽四川亦漸安靖疏言粵西之賊無幾實窮民無告相隨爲賊推原其故總由被兵省分不以安民爲主祇以勦賊爲能賊不能平又以擁兵爲事民擾于賊又擾于兵無論賊不能平卽出力平之僅得此邱墟之邑凍餒之民朝廷又安用耶請

飭行直省督撫于業經收復之地責成州縣以勸課農桑爲首務庶幾衣食足而禮義興秋再充順天鄉試副考官四年管理戶部三庫事務署翰林院掌院學士閏月偕協辦大學士瑞常按事陝西五年五月疏言竊聞唐臣張九齡有言六合元元之眾縣命于縣令宅生于郡守爲治之道唯重守令而已宋儒胡瑗教人立經義治事二齋朱子以爲安定門人皆能稽古愛民則于從政何有是知學而後仕臨民之具不

外乎此今自軍興以來勞績與捐輸競進科甲得缺較少流品亦稍雜矣自非大吏抑奔競進醇厚未易膏澤下于民也原設官初意府州縣皆名曰知必須洞悉地方情形愛民如子然後民戴之如父母矧當黎元塗炭血肉糜于鋒鏑肝腦膏于原野而守令猶不取忠信之長慈惠之師唯以苛刻辯捷爲能此旱潦所以薦臻干戈所由未息也爲今之計莫若擢循良之吏與民更始而凋敝之區尤必認真撫字勸農興學俾民食漸足而士習漸純凡好惰好奢好鬪好訟諸弊皆因地制宜悉使改革將見元氣可復百姓日遷善遠罪而不自知卽散勇回籍亦不至更滋民害蓋獎廉舉善則中材可勉爲賢哲胥由大吏鼓舞而振興之耳我皇上御極以來激濁揚清之典已屬盡善而特保循吏各省

尙少舉行似乎風勵之途未廣請

下直省督撫于府州縣擇其循聲最著者送部引見俾收觀感興起之功報可六年八月署工部尙書再署翰林院掌院學士七年正月充武英殿總裁初稔匪張總愚等股匪渡河北擾兇燄甚熾各路大帥俘斬雖眾而首逆未擒悖衍念兵無統屬難期成功疏言近聞賊匪狼奔豕突侵擾至祁州饒陽一帶屠戮甚慘襄陽彌盛前以其逼近京都縱而勿戰猶可云慎重從事也今離京較遠又恐其誘我而按兵不動豈不類于因噎而廢食乎茲聞宋慶張曜各軍俱有欲戰之心以無所稟承不肯獨執其咎而百姓之痛遭荼毒者傷心慘目不忍言矣昔漢初平元年關東之兵無所督率故袁紹孫堅之師皆孤唐乾元二年相州九節度之兵不能統一故郭

子儀李光弼之師皆潰節制多門進退難必欲合齊肅其可得哉應請于親歷戎行勲勞疊著之李鴻章左宗棠諸臣畀以專閫總統各路布置前鋒四面策應俾迅速戡事豈非伐謀之上策歟上躋之未幾李鴻章等奏報六月二十八日生斃張總愚全黨悉平二月往天津驗收倉米值捻賊肆擾逼近漕船居民紛紛遷徙津城幾陷惇衍督飭在事員弁與紳民嚴密防護兩次擊退搶渡悍賊地方以安八年五月丁母憂回籍十三年四月遭疾口授遺疏遂卒年六十一是日見紅雲滿空如誕時大吏以遺疏入

諭曰前任戶部尚書羅惇衍學問優長持躬恪慎由翰林洊擢正卿屢司文柄嗣因丁憂開缺回籍茲聞溘逝悼惜殊深羅惇衍著加恩照尚書例賜卹任內一切處分悉予開復應得卹典該衙門察例具奏欽此

賜祭葬諡文恪惇衍篤志理學與倭仁曾國藩吳廷棟等互相砥礪所得曰深自以身爲大臣日以薦賢爲務雖愛才稍過奉

嚴旨申飭不少悔所保奏如林則徐周天爵駱秉章曾國藩倭仁鄭敦謹袁甲三吳廷棟姚瑩仕粵者如吳昌壽李福泰崑壽皆重其人屢形章奏至往陝查巡撫劉蓉布政使林壽圖被參各款秉公奏覆二人事卒白其愛才念切務求保全如此所取士如李瀚章黃鈺孫家鼐張兆棟嚴樹森周壽昌吳贊誠等皆顯于時論者服其藻鑑著述存者濂洛關閩六先生傳一卷本朝崇祀三先生傳一卷集義篇三十卷百法百戒庸言一卷孔子集語十四卷感應篇引經箋註一卷奏

稿二卷而所最用意者詠史七律一千六百餘首臨終猶手注之今皆藏于家子四人築三品廕生榮辛酉舉人榮槩俱諸生

據方濬師撰行狀修

梁梅號子春道光戊子優貢少有至行每得異書母氏嚮欵珥購之及母卒哀慟幾絕年三十尙困童試布政使南城曾燠試粵秀書院課見所作賦數篇大為驚賞招入署中校文由是所作駢體具有矩矱又為延譽于程學使國仁補邑庠總督阮元開學海堂見梅所作咏蓮鬚閣黃牡丹詩事歌結句云可憐賓王皆奇節獨愧當年校藝人讀之擊節既貢成均學使翁心存攜入征途相與酬唱及報罷則下津沽道汶泗出大江沂漢口遍經衡岳梧溪桂林諸名勝豪筆留題抵里後以游草呈山長陳鴻輝錢儀吉咸擊賞焉鴻輝次韓愈

送區宏南詩贈之蓋深許之也家藏有漢瓦晉孰宋畫及宋元明善本書籍初搨碑帖數十事朝夕摩挲至忘寢食其篤嗜如此然不善治生晚年家漸窘而癖古愈甚又喜施予雖斷炊不顧也卒年五十有一著有寒木齋詩二卷文二卷

據采

李應田字研卿陳村人宋忠簡公昂英之裔也父清華舉人內閣中書應田道光癸卯舉人咸豐壬子進士選庶吉士散館授編修丁巳分發東河學習以堵禦功加侍讀銜次年丁母艱奏留辦軍務獎敘以道員用卒於杭州差次年四十

據世良撰傳修

周寅清原名以清號秩卿舊寨鄉人父廷珠庠生寅清少好學年十六游庠應學海堂課屢列前茅藉膏火以養母屢試

不售乃入都中式道光乙未北闈舉人甲辰成進士簽掣山東歷任甯海州城武高密臨淄昌樂等縣時各縣多水災惟臨武呈大府得緩征將去任士民留之者萬計大府許以不逾時反士民始釋所在以倡率文教爲務月課士捐廉厚其膏火寒畯賴之丁母憂去官逋負山積戚友解囊相助始能旋里主講鳳山書院充學海堂學長分纂廣州府志僅就緒而卒所著有典三賸稿耀廊經義月課文存藏于家據采訪冊修翁樹連村人少失明長有膂力母先歿父老病不自存時或絕食樹傍徨無計默念禪詞推命之術皆瞽者所能而家貧無從得師且習之必一二年始成老父嗷嗷不能待乃偃偃赴村市求爲廡下春情辭哀切主人憐而許之其春乃過於有目人由是日得傭錢以養有時食於主人家必先市酒肉

歸然後往食粵地賃春多以日計每歇一日則炊米進父而別於他所煨薯芋自食歸告曰兒食某處飽矣蓋減己之食恐父知而不安也如是十餘年父賴瞽子溫飽以終咸豐四年賊起歲饑樹無所得食入山刈草販以自給竟餓死龍躍

山中

據采訪冊修

賴瀛別字榴海龍山人父經家素豐授以讀少卽力學工文遭父喪哀毀骨立叔爲父所愛分家財之半與之舊稱貸不能還者悉焚其券鄉里推長者咸豐癸丑賊起乃令族中有田者各捐穀存祖祠備平糶甲寅土賊發族人得食無隨賊者遭母喪不以年高廢禮哀毀如喪父時未幾卒年七十所著有色香俱古之室詩鈔七卷試帖二卷養拙移文集二卷藏於家子孟瑜咸豐辛亥舉人德琬諸生炳琦同治癸酉舉

人孫孝通諸生據李光廷撰行狀修

何應志字光遠良教鄉人明雲南布政使淡後也父維仁賀
易高州水東墟應志往助之敦誼重諾父業大起弟五人父
遺命多分應志財應志絲粟皆與弟均無所私故弟亦事之
如父生平好義姻戚賴以起家者數十人待以舉火者數百
家雷州饑運米至赤坎平糶為武弁所阻事聞于縣斥武弁
州人德之咸豐四年土賊起應志曰此皆饑驅耳捐米萬石
鄉人無從賊者六年米貴復倡賑全活無算同治三年高州
饑運米至水東平糶高人頌之如雷州水東會館落成乃名
其堂曰光遠示不忘也卒年七十六子成杰成熙皆諸生據羅

惇衍撰墓志修

鄧雲襄號蓉裳龍山人邑庠生同治元年報捐知府分發廣

西委署泗城府事時府城先已失守雲襄駐那地五隘等處
招募民勇圖復城而賊首廖萬服楊通潮故與勇目張三通
氣張三密麾之使遁去雲襄到任知賊大隊萃于西林命其
子樹榮往勦十月與賊戰於八桃大勝之賊分竄涿林那安
底孟四年正月雲襄親自進勦分兵守平西渭邦以固縣治
並守八渡以杜援賊然後五路札營遇賊於平郎山敗之乘
勝破涿林那安賊奔底孟三月援賊至為八渡之勇截擊勦
除殆盡雲襄乃令總目馬有德偽為小販入賊營以作內應
約舉火為號夜賊營火起我軍直入各營皆踴躍爭先賊大
敗廖楊僅以身免走雲南土富司之那良雲襄連夜拔營前
進先牒廣南府土富州會兵助勦督兵入境與賊遇又敗之
陣斬大旗手陳必大四月賊首楊通潮親率大隊來撲力戰

擒之初七日各營齊進遂生擒廖萬服餘黨股慄乞降西林平雲襄已得病求離任不許六月遂卒巡撫張凱高上其功奉

旨加太僕寺卿銜祀昭忠祠廕一子知縣據行狀修以上順德

南海李徵爵分纂

番禺史悠履初校

番禺史悠乾再校

番禺金佑基三校

南海顏以湘四校

廣州府志卷一百三十三終

廣州府志卷一百三十四

列傳二十三

新會

國朝 東莞 從化

龍門

增城

何如栻

李潤香

蔡涇

鄧崇弼

劉天維

譚志道

尹源進

鄧奇

陳應乾

莫夢呂

鍾兆晉

盧鼐

黎銓

李作楫

祁上樟

張朝紳

莫士秀

陳應中

陳燕明

林鳳岡

文超靈

鄧廷喆

陳似源

林貽熊

譚昇

羅復晉

鄧繼禹

李曹源

弟圻

林蒲封

翟桓

羅天錫

鍾曉宣

溫章元

植璋

葉至剛

父雲鶴

林錫齡

鄧大林

盧聖存

鄧大經

黎攀鏐

張金鑒

張敬修

以上東莞

張雲從

李捷雲

張德桂

以上從化

戴光震

譚六經

戴覺

廖觀

李善長

廖蔚文

廖逢泰

李隸中

譚綸邦

李璠

弟珍 李錫韜

譚士瓚

李步蟾

父晃中

李柱蘭

以上龍門

姚岍

湛鳳光

單私淑

劉嘉彥

陳輝壁

呂其瀾

鍾文英

梁楨

馮天載

馮雅玉

湛祖貴

陳維嶽

以上增城

陶璜

葉夢稷

林宜逢

黃慶錫

蘇楫汝

黃離炤

吳季珩

鍾昌先

張偉仁

子成遇

顯遇

任清漣

父猶龍

子榛

椅

呂諦作

陳吳昌

張翩然

莫象年

梁壯士

陳士一

胡方

黃騰五

黃隆光

倫相國

吳立等

黎大剛

李自明

張耀新 陳士英

鄧國祥

何岳鍾

何瑄

以上新會

國朝

何如棻字柏友東莞北街人少厭羈束年二十始折節讀書所作古今文雅有原本崇禎甲申如棻聞變大慟棄去諸生遂奉母隱居梅園躬耕給養常獨遊山水怨歌涕泣人莫測其意如棻祖父季於宋元間抗節不仕吟咏皆寓黍離之感嘗有詩曰正氣莫教銷鑠盡典型留與後人看乃以看型名堂時謂何氏世有逸民年八十餘卒據張府志修

李潤香字岐生石鼓人順治初為裨將屢著戰功從征廣西克梧州授水師副將值西寇犯境海賊陳其策帥賊艘會之總兵蓋某戰死潤香繼進奮勇擊賊矢集於面戰益力賊敗走遂進勦平上下川古兜深灣赤溪廣海文村諸寇未幾撫日周真李榮暨碣石鎮蘇利叛潤香率舟師討之獲真榮遁走敗利於大星角擢驃騎將軍移鎮虎門聞賊揚金目突入

白沙湖潤香與戰焚其舟時吳三桂叛藩將趙天元謀通賊

乃潛解潤香兵反正後惠州寇踞石龍起潤香於家與譚昇

為犄角敗之庚申海孽謝昌等破虎門巡撫以潤香宿將使

督戰艦直搗海陵所向皆捷尋卒於軍

據阮通志修

蔡涇字元真順治戊子邑大饑涇出穀數千石以賑多所存

活嘗修邑學宮廣州光孝寺惠州金斗石橋所費鉅萬人稱

長者涇善金針開瞽之術人以醫仙目之

據郝通志修

鄧崇弼性恬淡居家以孝友稱鄉有訟者咸畏其知尤能恤

災為鄉鄰保障順治己丑東江暴漲福隆隄決崇弼率其子

光似孫際亨傾家橐募眾竭力築隄隄成九十餘鄉恃以無

恐人多其功崇弼未嘗有德色也卒年百有奇大吏以高隱

表之

據郝通志修

劉天維字卓爾順治八年辛卯舉人授江南望江令政尚寬

厚日諭耆老以孝友睦婣董其鄉里會兵興徵發旁午天維

請一切取辦公帑不以擾民望江魚蘆二稅自明末迭增舊

籍寢亂天維履丈宿弊一清性廉介居處飲食有寒士不能

堪者莅任五年頌聲大作以足疾去士民立祠祀之

據張府志修

譚志道字岸選大甯人順治八年辛卯舉人授福建永福令

康熙甲寅山賊圍城時志道已去任以士民請復嬰城固守

五旬數出奇兵挫賊孤墉以全姪黃璣死於陣旋遭閩變耿

精忠欲授以官堅拒不受反正後大吏咨請敘用以老疾乞

休卒著有讀易本義

據阮通志修

尹源進字振民順治十二年乙未進士授吏部主事擢考功

郎掌內外計察謝絕苞苴直終養歸築東湖蘭陔別墅以娛親

居喪哀毀骨立鬚髮為白方滇黔作亂兩粵淪陷源進匿跡山中賊帥脅以兵終不屈康熙十八年起補驗封晉太常寺少卿卒於官據張府志修

鄧奇字挺庸茶山人順治十四年丁酉舉人選河南原武令邑地瘠民貧催科急民悉稱貸以應奇寬其限蕪田數百頃為招墾復業舊兌糧在臨清倉道遠費煩奇力請就近至今便之子廷詰別有傳據阮通志修

陳應乾字履古城西人順治十五年戊戌進士除湖廣宜章令禮士愛人革除宿弊宜章有錫山關為一邑形勢要因緣牟利恣其採鑿應乾請監碑封之有吳總戎鎮宣城月派丁夫刈草率入錢三百歲歎萬計大為民困應乾又請罷其役以是致憾卒中其忌解組歸里與邑人莫夢呂鍾兆晉相

與為文酒之會夢呂有文譽從學者最眾順治辛丑進士詞壇推為老宿兆晉邑諸生以能文稱據張府志修

盧蘊字升卿少孤事母孝謹家蓄古今書最富考覈寒暑不輟好購置文石及古玩器暇則出以娛客摩娑忘倦有米元章趙孟頫風味順治十五年戊戌進士聲譽藉甚以遊瓊南遇風恐怖歸未幾而卒著有鄰山堂集十餘卷據張府志修

黎銓字聖宣早失怙恃事大父母及繼母至孝家貧取給販鬻夜則發書讀之膺順治十七年庚子鄉薦戊子盜掠其鄉大母被執銓匍匐賊營求以身代賊感動釋還為人尚氣節言動不苟工詩著有宜春園詩草據張府志修

李作楫字濟巨性方正慎默順治十八年辛丑進士授推官改溧陽令微服抵任胥吏相顧失色不敢干以私值歲荒設

賑凡三閱月活饑民二萬有奇遷汾州同知民籲院司請留
 定次年編審許之作楫設榻公所親為指授勾稽不假手胥
 吏事竣役平賦均尋補九江同知時土寇數百人方就撫以
 安插未得當屢為民害作楫領數騎乘間抵賊穴縛渠盜嚴
 矮子等以歸餘黨令入伍或歸農間井以安上官嘉其能遇
 疑獄輒令讞鞫朝下夕報多所平反升鶴慶知府府學舊經
 兵燹首為修復地震陷民居數千作楫請開倉借賑殫心撫
 恤災黎皆得復業丁艱起補大理知府潔已率屬和輯軍民
 郡以大治後告歸著有藏公堂集中山治畧卒祀鄉賢子繼
 照內閣中書繼燕吳江知縣孫國敏唐縣知縣曹源平舉知
 縣圻廣甲午舉人據張府志
郝通志修
 祁上樟字仲木牛眼石人賦性孝友重然諾年二十二遭賊

擄其父謀諸兄弟稱貸三千金贖之既而家中落無以為養
 遂棄儒業行賈以營甘旨凡親之所欲莫不畢給尤睦於宗
 族遇羣從子姪不能親師婚嫁者悉力資之嘗遊粵西見東
 民被賊擄流離在道凡百三十七人樟為具船米載之以歸
 南甯號為戰場白骨盈野樟捐貲掩骼於西平橋畔封為義
 塚今尚可識撫蠻傅將軍夙知其才每諮於謀議多見採納
 欲官之不就子聖年任竹谿令時迎養於官有大事必稟命
 裁決果以行取得陟卒年九十有二據張府志
修
 張朝紳字偉行康熙三年甲辰進士任高密令廉介清白愛
 民如子興學校忠刑獄循聲甚著時邑有棟稅為民累貧戶
 不能輸紳力請為豁除之不能得乃括俸錢斥賣衣物為代
 完焉解組歸囊篋蕭然殊不介意著有醉古洞詩文年八十

四卒孫光被康熙丁酉舉人

據張府志修

莫士秀字彥升郡諸生性至孝祖母病隨母潘侍奉祖母不食士秀亦不食一夕祖母病甚士秀祝天請以身代恍惚間有朱人授以丹旦即其處得之隨進而愈人以爲孝感所致居母喪哀毀骨立將窆躬負土傷足流血暈絕半日始甦謂其二子曰葬事畢吾將從母於地下矣大慟而逝長子雲翹領康熙己酉鄉薦

據郝通志修

陳應中字麗西明贈少保策曾孫領康熙二年癸卯鄉薦授永平令邑當畿南孔道大軍方討吳逆兵車旁午加以饑饉頻仍上籌軍給下撫瘡痍凡無藝科派革除殆盡民賴以甦以循良擢廣西道御史巡視中城轉山東道御史畿內奸宄遁跡時有大獄久未決總憲于成龍以屬應中執法摘奸不

避權貴後以病歸卒於道

據東莞志修

陳燕明字晉公北柵人康熙八年舉人授完縣令甫下車即革除浮稅旌軍武禿子奪民妻李氏匿於京前令不敢問燕明移南城兵馬司執置諸法還妻於民歲祲設賑緩徵存活甚眾年老請告巡撫于成龍以完民借寇情切勉留視事病卒於官

據東莞志修

林鳳岡字桐叔號石嶽茶山人負雋才康熙初年撫蠻滅寇將軍傅宏烈恢復廣西聘請入幕屢建奇策以恢復梧州等處功授梧州府同知時地方初定流離載道鳳竭力維持撫恤民賴以安撫軍郝某常委以疑難重案剖決如流內艱服闋赴都延入王府甚見禮重以父艱歸里遂絕意仕進與梁佩蘭輩晨夕吟咏而交遊轍迹幾遍天下云

據東莞志修

文超靈字捷叔涌頭人康熙十五年丙辰進士授宜興令為政不務培擊以重農積粟興學敷教為汲汲邑積逋數萬權其緩急勸之輸將不敲扑而課已辦民悍而健訟吏黠而舞文超靈躬讞決盡得其情偽宿弊遂止乞休歸民歌思不忘

據阮通志修

鄧廷詰字宣人由副貢領康熙二十三年甲子鄉薦庚寅考授中書熟於掌故以資量移典籍五十八年安南循例請封詔以廷詰充正使

賜一品服出關日商旅納賂請以貨從嚴斥之簡僕御杜私交所至肅然嗣王欲循夷禮受封廷詰正色曰

天朝典禮誰敢隕越卒用舊制事竣餽遺一無所受雍正元年

詔舉廉能閣臣以廷詰薦

溫旨褒嘉

特賜內緞豐貂漸當大用遽引年歸里居八年卒著有蓼園

草皇華詩畧

據東莞志修

陳似源字昆霞北柵人康熙二十四年乙丑進士選庶吉士授編修性穎異博學宏通纂修一統志著有敬業堂集平生篤於孝友力貧養志比稍充裕先營祀產次以周族人之貧乏者家之有無不暇計也邑七都植香為業民困於徵求將伐樹遁似源詣上官具言狀賦賴以寬靖康場竈民以柵甲為累似源設法白於官均其役場丁德之卒年七十三子之遇康熙戊戌進士安定令庭槐應槐俱舉人昌槐副貢庭槐與之遇同舉於辛卯應槐與叔俊英從兄某同舉甲子人以

為行義之報云據張府志修

林貽熊字赤見水北人康熙四十二年癸酉舉人癸未禮闈
粵東無中式者貽熊聯名籲請得定分省中額選授山西長
治合邑故貧瘠前令虧空繫獄中者囂囂貽熊至捐俸為之
彌補盡釋之歲貢潞紬織戶苦徵納請優給資本以甦其困
後補河南臨潁縣值滎陽河決辦理工料殫心畫策民無所
累河北薦饑民就食河南者日數萬人所司欲盡驅出境貽
熊不可請散賑凡八閱月存活無算擢陳州牧州屬地稅不
足舊額時方議按畝加增貽熊以去就力爭得免大吏以賢
能薦會鄰邑解囚至州越獄坐累罷歸據張府志修
譚昇字洪績以百總從征龍門碣石諸寇皆有功吳逆之變
棄官歸會海寇嘯聚石龍糾惠州叛黨將犯東莞當事莫能

破敵者眾推昇遂以千總署副將事率師會勦時賊洪拜祥
等蔽江而下勢張甚昇所將僅千人乃以疑兵誘賊伏巨礮
碎其舟潛以輕舸乘之賊大潰擢副將率舟師討梧州撫蠻
將軍傅宏烈疏薦升廣西水師總兵官破賊於梧州之三合
嘴復藤縣平南貴縣橫州柳州武昌等城廣西悉平

賜日講書經解義尋以勞疾乞休卒於家據張府志修

羅復晉城西人由翰林院孔目擢戶部郎中時議開廣東銀
鑛晉敷陳利弊力持不可事獲息丁繼母艱服闋補郎中清
查甘肅錢糧半月事竣出知撫州府金谿有巨棍名十大寇
八金剛延害地方晉訪拏伏法闔郡得安捐俸設立書院捐
給膏火人文蔚起攝篆臨江適遇災荒晉多方補救闔屬始
以安全云據東莞志修

鄧繼禹字龍彥康熙四十年乙酉鄉薦授四川新津縣招徠
流民得增丁口邑抵大紅金馬河當漲每虞淹沒禹捐俸疏
鑿遷倉廩廬舍於寶資山民居積貯賴以無虞任八載兩遇
荒歉設法賑給存活甚眾擢都察院經歷督通州糧餉尋卒
於任

據東莞志修

李曹源以歲貢授高明教諭兼護縣事擢粵西平樂知縣俗
種蠱毒人窮究根株置其魁陸某於法并刊解毒除蠱良方
傳之通省蠱風頓息署富川賀縣及攝府篆所到有聲大吏
以堪膺道府特薦親老請歸弟圻康熙五十三年甲午舉人
幼穎悟至孝性成選授福建長汀縣留妻養嫡母單騎赴任
開徵日設櫃公堂令納戶封投以杜加收之弊汀邑田少仰
食於雩都瑞金兩邑而雩瑞鹽甚昂圻出示令人運米一石

來汀許買鹽二包於是兩邑之米源源而來汀民無貴食調
臺灣以生母年老辭丁內艱歸士民號泣而送者相望於道
焉

據東莞志修

林蒲封字鼇洲始就塾日誦數千言十齡喪父哀毀如成人
經術湛深天文律呂醫卜諸書靡不窮究尤工書法雍正八
年庚戌進士選庶吉士授編修歷翰林院侍讀右春坊右庶
子晉學士官侍從者二十年性恥奔競退食之暇閉戶著述
蕭然如寒素嘗採唐魏徵十思十漸李德裕丹辰六箴宋司
馬光五規括其大意作保業惜時遠謀重微務實五箴以獻
屢和

御詩稱

旨纂修國史敏練精勤熟於故事凡有舛誤侃侃正論人莫

能屈編纂日講解義

皇清文穎校刊經史三通無不精當樂施予俸餘悉以周親族疊奉分校北闈督學江西之

命

上眷方隆而蒲封適遘疾卒

命馳驛歸葬著有讀史錄十四卷詩稿十卷文稿十卷據張府志

東莞志修

翟桓字容士周溪人邑諸生母喪廬墓三年邑遭寇掠負父避走艱危萬狀卒獲全撫育兩弟以私財均之雖處貧約非其義不以干人卒年八十餘據阮通志修

羅天錫字澤敷性至孝甫弱冠母病籲天割股病遂愈後父病革復割股雜藥以進父病漸瘥人以爲孝感所致丁內外

艱哀毀踰禮哭泣之聲三年不輟聞者惻然據阮通志修

鍾曉宣家貧父卒母欲以身殉曉宣時五歲跪而請曰母死兒何以生母爲感動稍長鬻薪供母奉養必出自己力有餽之粟辭不受母疾籲天以身代居喪水漿不入口獨居思母常終夜哭老亦如之乾隆元年題請建坊據東莞志修

溫章元字司袞舉乾隆十七年壬申鄉薦第一十九年甲戌中乙榜以知縣揀發湖南歷署永明安仁鄱縣攝辰州永順同知補新甯令所至以廉惠著公餘輒進諸生講學論文多所造就以勞瘁卒於官囊無餘資邑人飲助以殮立祠於城隍廟側祀之據阮通志修

植璋字綱四水南人有勇畧善騎射乾隆二十二年丁丑一甲二名武進士充二等侍衛授浙江鎮標遊擊薦陞湖北均

房營參將會金川跳梁隨定西將軍阿桂出師克復鄂克什美諾等處功最每身先士卒不避矢石中傷卒於軍奉

旨優卹

據東莞志修

葉至剛字配義有勇畧器識過人乾隆二十二年丁丑武進士充侍衛授陝西懷遠堡都司陞延綏鎮標遊擊隨定西將軍出征大金川自當噶拉山梁派駐得勝橋七晝夜攻獲碉卡數十餘座進攻木谷賊碉克得木特馬爾邦等地方擢靖遠協副將丁內艱服闋陞本省雷瓊鎮總兵到官巡視鎮所往返僅七日弁兵不擾有石綠山關本郡形勢土豪欲開取以重金獻拒弗納生平寡交遊待士卒嚴而有恩賞罰明信故能得其死力所至有功尋以事謫戍卒於道年六十一

阮據通志

林錫齡字越百性聰敏乾隆二十五年庚辰舉於鄉以知縣揀發福建攝長汀令聽訟公明多出冤獄尋補大田舊案山積口占手判無留牘囹圄為空革紙鐵菰笋諸私稅勸民設義倉歲歉無流亡者邑有盜蘇光贊嘯聚為患以計擒之餘黨遂散捐俸設書院親課邑士如嚴師在官十餘年服食如寒素以辨銅赴滇邑民遮送多泣下者遷廣西永安知州引見卒於京邸生平耐清苦負氣節其所守毅然不可奪卒時囊無餘物子沿途丐助喪始得歸

據阮通志修

鄧大林字震東父雲鶴領雍正己酉鄉薦品詣為時所重大林年十三失怙哀毀幾絕母病醫罔效籲天減算以延母壽母病旋愈登乾隆辛巳進士選庶吉士改戶部主事擢員外郎江右災撫軍請免蘆稅同官以江右無免稅例擬駁大林

不可曰天下無分民可援浙省例免也閩督飭富民買穀實倉大林又持不可曰官穀責諸富民是啟有司勒派也司農如其言以奏皆報可遷禮部郎中尋除廣西道御史以母老乞歸有以重金乞一言於當事者峻却之四遇歲祲皆捐貲倡賑邑士人欽其風範者數十年年七十一卒著有餘齋集四卷

據阮通志修

盧聖存字方維增步人少赴省試夜有奔女嚴拒之舉乾隆二十四年己卯鄉試第一二十八年癸未成進士授山東肥城知縣邑中義學久廢捐俸延師厚其館穀向者差務多取給於民聖存首革其弊悉捐廉自辦居官八年不攜家累以廉介著聲

據東莞志修

鄧大經字敬敷乾隆二十八年癸未聯捷進士授河南內鄉

令內鄉地素荒陋士鮮知學大經甫下車修建義學召諸生講貫文教日興復革陋規除蠹役民賴以安時值金川不靖軍役繁興有司或藉端科派大經凡有需費絕不取諸民民益德之莅官三載引疾歸士民走送數百里居家教授獎誘不倦邑令史藻知其貧分俸資之力辭不受卒年七十五著有倚雲樓集四卷

據家傳及內鄉惠愛碑修

黎攀鏐號半樵黃陂人嘉慶戊寅舉人道光癸未進士觀政戶部時新疆用兵部務殷繁攀鏐經畫有方堂官知其才派充正稿兼本衙門則例館總纂官十四年補主事升員外郎派管捐納房事務十六年除湖廣道御史甫視事即奏已革書吏改名復充

上以其公事認真賞加一級旋

命稽查普濟堂事疏陳粵東積弊十事凡練兵籌餉禁暴詰
 奸皆關係國計者閱三月擢禮科給事中前後章十上如整
 飭捕務飭知縣親理命案等疏皆報可十七年稽查北新倉
 事務擢福建興泉兵備道閩南民俗強悍號稱難治攀鏐輕
 車赴任嚴革陋規元惡大憝有犯必懲甫數月盜賊屏跡厦
 門舊有崇實書院親自校閱於膏伙外重給獎賞公餘召諸
 生入署欸以酒食訓之讀書立品士皆欣欣向上署中案牘
 文檄悉皆親裁不假幕友之手上游咸重之十八年調補江
 南河庫道去任之日生童賦詩父老焚香者不絕及抵南河
 庫欸先經查辦攀鏐益加兢慎鈎稽筭不厭詳審務使帑
 不虛糜嘗曰此官惟司出納會計當便為稱職不如在閩之
 與民相近也二十一年河帥麟首薦攀鏐可大用而攀鏐以

父母年老遂告養歸家居二十餘年優游奉侍不出里閭當

道罕識其面終養事畢以年老不復出年七十四卒子家蘭

家騏同中道光己酉科舉人孫鳳儀中光緒乙亥科舉人

據東莞張金鑿字卓英城內人祖夢梅嘉慶庚申鄉薦吳川縣學金

鑿少聰慧工文道光己亥舉人甲辰進士籤分禮部充軍機

章京給假回籍咸豐紅匪之亂金鑿督率鄉勇屢破賊城賴

以安事平保奏以郎中升用家居主講寶安書院未幾卒年

四十六

據東莞志修

張敬修字德甫唐殿中監九臯之裔明季贈城侯名家玉諡

文烈者其遠祖也敬修貌不逾中人而權奇雄爽有豪士風

時四郊多壘慨然欲有所建立乃援例捐同知籤分廣西委

廣西委

署慶遠同知調百色同知中歷柳州思恩平樂凡募壯勇造軍械皆出私財濟公民間傳爲毀家紓難者也當是時楚賊雷再浩李沅發之擾桂林者相繼殲而粵賊范連得羅大綱相繼起當事以餉絀兵單欲招撫了事敬修歎曰是懸賞以招盜也面陳大府請移師會剿議不用乃以弟喪乞歸築園蒔花無復宦情矣道光三十年金田盜起粵西大震

朝廷以師無功起湖督周天爵爲西撫敬修以尙書杜受田薦

詔赴軍前乃選精兵三百人謁周撫於武宣抵象州而周爲賊困乃以本部陷陣拔周出保薦道員旋補潯州府知府值黔軍失利

上命大學士賽尚阿督師討賊於永安適敬修追賊至督師命與臬司許祥光都統烏蘭泰營州之南提督向榮營州之西督師以大眾營州之北惟東面未合圍欲俟其逸而擊之也咸豐九年二月賊東竄督師檄各軍追賊賊迴戰於仙回嶺官軍潰亡四鎮將兵弁死者數千人賊直趨省垣督師急調敬修駐北關以通糧道越兩月賊走湖南擢右江道三年武緣土賊起遷江賊踞城興安賊又窺省城敬修奉檄先赴武緣中途克復遷江搜捕武緣皆獲其渠與諸軍會師興安擒其魁以獻功最

賞按察使銜時髮賊擾兩湖

上命敬修募水勇辦船礮赴楚將行而粵督葉名琛奏留粵西五年西賊困梧州未解東賊敗於肇慶欲西上與梧賊合敬修由陸赴援夾岸爲營扼其中以隔絕之忽南風大作賊

船千餘艘鼓掉張帆而上發礮沈船不能止賊遂越梧州破
潯州據之敬修以調度乖方落職留營効力敬修謀復潯州
乃用鐵鍊橫江以陸營夾岸請礮船一百艘備轟擊為步步
進逼計值夏漲發鍊斷陸營盡沒賊乘漲而下舟師亦敗敬
修立船頭督戰傷股墮水善泅者翼之出退保平南以傷病
回東醫治七年洋氛起粵督黃宗漢駐惠州適金陵賊黨竄
閩陷嘉應黃督調往東江勦辦敬修請檄各屬守隘自率所
屬五百人扼層坑入省要路堅壁不出別伏兵伺賊賊夜撲
營夾攻之賊敗走追八百里至仁化賊竄出境九年丁內艱
是秋黃督奏復原官授江西按察使請終制不許遂墨衰赴
任時江省久遭兵燹協防濟餉文案山積凡校理簿書平反
訟獄日夜不得息十一年兼署藩司事益繁神益耗以病乞

休歸逾年卒

據采訪冊修
以上東莞

張雲從字碧龍從化水東人六歲而孤母李矢節雲從未毀
齒輒能朝夕解母憂及長博聞強記絕意仕進竭力事親子
德桂成進士累官至僉都御史時李壽百歲雲從踰八十僉
曰是其母節子孝所致也雲從性狷介而傾囊濟族屬之貧
者居母喪雖老猶哀毀柴立云

據張府志修

李捷雲字雲步邑城人邑諸生事親至孝姊適歐陽氏貧甚
捷雲割腴田二十畝與之喜周人急有貸豪右錢而鬻其子
者捷雲給金贖之生平嗜學博通經史著有讀史臆斷子夢
元康熙四十一年壬午解元

據阮通志修

張德桂字兼蘭雲從子康熙二十九年庚午鄉薦三十三年
甲戌成進士授館職聲噪詞林粵米向徵折色德桂疏陳利

弊請改本色得

俞允至今賴之乙酉授國子監司業改侍讀遷太常少卿通政司參議轉奉天府丞提督學政先是奉天郡邑諸學惟設附生德桂疏請設廩增士咸知奮轉太常寺卿升通政使擢副都御史以親老再疏乞歸卒著有天文管見六十卷玉堂文集三十卷介節堂詩草二十卷據張府志修以上從化

戴光震字蔚森龍門詹邨堡人崇禎壬午膺薦時年已七十一矣母廖氏年九十五尚在光震以母老未赴廷試甲申告變移居增城臘月六日山賊數千攻龍門城光震聞變即訴增城令請援時城中久困知縣白為袞出白金千兩求和賊得金弗退圍益急幸援兵至圍解邑人德之年八十六卒據龍門志修

譚六經南門人積學篤行順治四年山寇破城殺典史汪熊六經罵賊死之據大清一統志修

戴覺南門內人邑諸生性至孝順治四年賊破城擄其父欲殺之覺跪泣求釋願以身代賊憐之乃械其父覺又乞代賊乃兩釋之據大清一統志修

廖觀字出潛號星嶼功武五宅人幼穎敏為諸生有聲順治十八年辛丑第進士深究心性之學闡發陳獻章宗旨四方來學者履相錯也事親以孝聞尤樂行善事周急賑饑於鄉閭多所裨益觀歆然自下無矜心恬淡和平遠邇悉高其行卒祀鄉賢據龍門志修

李善長字仁昇蓼溪龍江人少倣儻有雄畧虬髯星目膂力絕人甲申之變土賊李培芳易昌唐隆嘯聚塔嶺下蹂躪其

鄉順治十年春善長自湖廣回羊城聞之痛哭誓不與俱生
挺身赴藩府請兵勦賊聲淚俱下藩府壯而哀之會縣令方
以甯亦請用兵遂命牛永劉秉功領兵進勦善長親為嚮導
直擣賊巢擒斬李培芳餘黨潰散先是鄉為賊踞族之未死
者無家可歸至是始得復業善長初以功授增城把總踰歲
轉東莞千總尋擢提標守備康熙初卒於官

據龍門志修

廖蔚文字君豹功武人康熙六年辛酉舉人授廣西懷遠令
莅任六載政聲卓著犴獐畏威催科不擾歸里後修祖墓設
祭田足跡不至城市素好吟詠暇則以詩遣興云廖逢泰字
聖鐸乾隆六年辛酉舉於鄉任浙江蘆瀝場鹽課大使稽察
北新關稅務歷署永嘉海砂崇明王泉四場事政聲藉甚商
民便之時值

高宗南巡辦理大差拜緞疋之

賜戊子庚寅辛卯分校浙閩尋以獲盜功擢陝西米脂知縣

去浙日士民賦詩頌之

據龍門志修

李隸中字司五號厓峯蓼溪繩武人待舉之曾孫也世有隱
德隸中少聰慧而好學過人與兄穎中弟晃中先後以縣冠
軍補弟子員隸中旋食餼學使夏之蓉吳嗣富器重之乾隆
十七年壬申舉於鄉壬辰挑發山左老成練達上官倚重焉
歷署福山黃縣夏津博山邱縣及德州州判事借補臨清直
隸州州同所在多善政權福山時有悍卒奪諸生產廉得實
按以法營主求免不得甚悍卒誣控上官悉隸中誠懇為白
其誣反坐弁兵時論快之其任黃縣值土寇騷擾臨清壽張
各鎮會兵進勦隸中辦理得宜人民安堵調宰萊蕪萊蕪地

瘠民貧風俗獷悍夙號難治隸中甫視事半載舊俗頓革有張某者欲奪弟貲誣以亂倫佔其田宅隸中一訊便吐實諭以大義兄弟感泣相友如初河南河決至曹州界所經地方供給夫料隸中捐俸不足貸粵商金墊辦郵書其弟昊中在家措償萊民無秋毫之累恭值

高宗東巡胥役里長私派侵漁隸中痛加懲治還所派於民而捐廉自効萊人感激聯送冠服屏繖緘笏縵密皆士民姓名也兩次接

駕俱蒙

恩旨加級

賞賜內緞荷包甲午庚寅分校鄉闈得士半捷南宮辛丑卒於任年六十二隸中歷宰六邑佐二州不名一錢時稱山左

清官第一所作感懷詩東人傳誦之

詩云十年書劍遠飄蓬此日纔膺百里封保赤

有心愁學淺禦寒無策為官窮板橋直接荒城路野樹橫懸古廟鐘但願爾民耕且讀訟庭花草鳥啼空所著有

宦遊草一卷蹈實山房詩文集二卷

據龍門志修

譚綸邦字佩勳岡厦塘面人貌修偉膂力過人乾隆三十年丁酉戊戌連捷武進士授福建督標右營守備四十七年署長福營都司護理福甯鎮遊擊五十年陞興化協都司旋代理興化協副將時臺灣賊匪猖獗綸邦領兵五百往勦駐春牛埔與賊遇捕斬百餘軍至沙岡殺賊數十至南壇又殺賊數十行次南路東港是夜賊萬餘放火劫營綸邦奮戰身先士卒殺賊甚眾賊敗走復追之又殺百餘人五戰皆捷以功擢汀州鎮中軍遊擊值考軍政第一題陞叅將尋為上憲所沮綸邦不屑干進且以生母年老遂棄官歸家居三十餘載

乃卒據龍門志修

李璠字負璵號孔美蓼溪龍江人質聰敏少承家學於書無所不讀為文援筆立就屢試不第以歲貢選長甯訓導未赴任卒弟珍字瑞璵國學生有幹濟才嘉慶七年博羅賊陳爛屐四作亂其黨千餘踞蓼溪之石塘謀中秋節起事珍偵知之陰與族人步沆聯絡近鄉壯丁分守要隘赴縣告急先期會勦焚其巢穴擒斬無算地方以安十年正月賊匪關亞盡等圍縣城縣令帥保元在省聞警馳回蓼溪執珍手流涕曰事急矣君能招健兒從我殺賊乎珍慷慨許諾星夜傳集義勇數百人親率之隨帥令赴援時賊方被火攻又聞帥令與珍眾至圍遂解犒賞一無所受卒年七十一李錫韜字集寬四方圍人父仁表諸生錫韜少承庭訓為諸生有聲且多幹

畧嘉慶十年賊黨陳傳俊關亞盡糾眾攻城錫韜先募米二

百餘石為軍需率鄉人登陴設策破賊地方獲安重修

文廟書院皆董其役舉鄉飲正賓卒據龍門志修

譚士璜字豹昭城內學背街人邑諸生早失怙事祖母李母戴孝聞鄰里操行端慤圭撮不苟取而樂於趨義乾隆三十四年亢旱與有力之家平糶濟饑存活甚眾癸未復罄家所有捐穀二百石於社倉族黨中子弟資其獎掖以有成者數十輩云嘉慶三年舉孝廉方正時年六十五

賜六品頂戴以終據阮通志修

李步蟾字敬躋號桂苑待舉元孫也父晃中歲貢其所作制義甚高兄隸中勸其俯從時尚歎曰得失有命豈能局促效轅下駒耶年逾五十絕意進取猶手不釋卷卒年六十二步

蟾天資英敏內稟庭訓益貫串羣籍髫年詩文膾炙人口工楷法受知學使史夢琦以縣試第一進庠食餼乾隆五十四年己酉拔貢朝考後以州判發南河試用深爲河帥所喜未幾請歸養甲寅丁外艱服闋改發甘肅權靈州花馬池州同花馬池爲邊郵要害番民互市最易生事步蟾恩威並用諸番畏懷軍民歛戢尋補秦州三岔鎮州判兼管軍糧鹽茶官此者向藉贏餘肥己步蟾一切裁革民有青天之目三岔舊無書院步蟾倡捐俸建士始知學己已因病告歸家居數載以德化其鄉人犯不避不敢見其面尤急人患難嘗陰脫村民无妄災彼此不相識也病痊回甘肅坐補甲戌攝平羅令絕苞苴勤聽斷謹邊防胥役有藉命誣富者痛繩以法縣屬士瘠民窮久苦逋賦步蟾寓撫字於催科民困乃蘇書院傾

圮捐俸倡修延名宿主講文風丕變去任日邑人餞者千計前此未有也旋署平涼府經歷太守楊某性嚴厲民有誤犯將坐以重辟步蟾爭之得輕比後遇疑獄必令步蟾讞鞫不用捶楚悉得其情郡東有柳湖書院公餘輒親爲諸生講藝士論翕服庚辰補三岔州判有繫囚寃不得白聞步蟾復任曰李青天來吾不死矣步蟾至廉得其寃出之道光初元調補安西馬蓮井州判三岔之民如失慈母受代時畱靴懸三岔城門北志去思焉莅安西清操如昔上官委查敦煌金廠王門墩塘餽贖一無所受乙酉駐州治讞獄詰姦而外未嘗輕撻一人績最將遷會疾作踰月卒年六十有八步蟾生平愛客樂施罄產不介於懷筮仕二十餘年清廉愛民不攜家累長子晉蘭往省輒遣之歸且屬其歲籌百金附西商寄助

薪水赴安西道中賦詩有但使初心能不負何須生入玉門
關句人以爲詩識云據采訪冊修

李柱蘭號鐵甫龍門人歲貢生迭署南雄永安潮陽豐順信
宜各學官所至有聲道光庚戌英德賊周亞華擾縣境指邊
疆險隘合防守賊遁去咸豐二年從化賊楊六糾黨掠龍華
墟距所居繩武圍甚近柱蘭由省歸中途聞變即函請鰲溪
壯勇伏兵鄧村墨湖各處柱蘭沿河招勇聲言統大兵勦賊
賊懼分股潰其由鄧村走者爲大兵殲斃百十人賊竄博羅
越二年甲寅紅巾變起陷龍門合尉皆遇害人皇皇無固志
柱蘭時在省往見制府葉名琛請委員領兵復城即赴新任
以定民志制府是其言乃命同新任朱燮往賊探知消息先
期遁城遂復己未冬署南雄州學正南雄爲人粵咽喉羣賊

屢窺伺庚申正月髮賊僞翼王石達開率數萬眾入州境州
官委柱蘭勸捐助餉幸平日以廉介見信三日內得銀七千
餘兩又廣州閩越豫章人商於雄者亦捐貲募勇助守城賊
知有備由平岡竄江西六月賊魁大戰坑豆皮春等率夥二
萬餘到韶州陷仁化將及州境州官集紳民議戰守柱蘭建
議謂守不如攻遂屯勇於琵琶嶺三楓塔等處數分兵劫賊
砦賊大驚乘夜拔營走九月賊首鄭大聲又至州境揚歷巖
時兵勇累月守城力已倦聞賊新至將退避州官命柱蘭守
城柱蘭嚴禁搬家出城又設賞購造謠言者人心遂定時攻
北門賊最悍柱蘭身自當之堅守八晝夜賊見城內不動遂
於十五夜沿山走遊擊方曜守備關鎮國分途追之大有斬
獲賊盡數竄江西信豐同治四年委署海陽教諭時髮賊僞

康王汪海洋率黨踞嘉應分兵四出擾及潮郡惠潮道張詵委柱蘭辦五社團練柱蘭乃派附近諸生編地方為五甲挨查製門牌實力稽查內匪不作而措餉又極裕故潮州晏然柱蘭雖以武畧稱而司鐸所至必申冤抑時西人欲入城百姓止之西人疑局中諸生所為構於省垣大憲大憲授意道府令教官將諸生劣案詳請以憑黜革柱蘭力持不可爭於監司謂生員無罪大憲以府順西人故責我輩為此其中曲直中外皆知某甯可引疾交後任辦否則腕可斷詳不可得也道為感動據實上覆獄遂解其挺直不撓皆此類也生平無他嗜雅耽吟詠詩文而外尚有雜著六七種藏於家卒時年六十有二 據采訪冊修以上龍門

姚岬增城人順治間山賊恣掠父熹被擄岬奔賊營叩頭出

血請以身代乃囚岬釋熹令以金贖金至得歸後賊黨復發流劫各鄉邑令議撫之賊曰必得姚孝子來乃降岬遂往招出徐某等四十六人分插各鄉開墾邑賴以安 大清一統志修 湛鳳光字用階沙貝人康熙二年癸卯發解謁選授深澤知縣深澤為畿內僻邑地瘠民貧故事新令抵任凡一切需用悉取給於里社鳳光下車一概揮去榜通衢永以為例滹沱河泛溢害稼鳳光單騎詣河濱相度形勢會邑父老議隄之得有秋徵收時輕其耗數月而輸將報竣總督深器重之方形薦贖而鳳光遽以勞瘁得疾卒單私淑石灘人康熙十七年戊午舉人選江南鳳陽府靈璧縣知縣鳳陽故明太祖豐沛地薄其征民恃此多惰廢反至貧瘠私淑至督耕甚力歲召其上農獎勵之自正供以外一切繁費皆罷免不數年成

樂土縣素多盜前令多以盜去官至是賊黨私相戒曰單公好官勿以我輩事累之也以母老歸卒

據增城志修

劉嘉彥塘尾人少尚氣好俠閭里少年皆宗之時尚可喜以平南王鎮粵諸無賴假冒王府人流毒鄉里曾縛其父仰周去嘉彥時僅弱冠馳往奪之歸有同門趙生族人負王府緡錢不能償王怒移之趙索之急嘉彥挺身見王說之趙得免既而折節讀書康熙十四年由廣州府學生員援例貢太學棟任潮州府程鄉學訓導次年海寇鄭某臨城全懷印綬潛遁賊平兼攝鎮平平遠二學時兵燹之餘學舍多焚燬嘉彥皆葺之率諸生考鐘伐鼓於其間絃誦聲不絕及歸諸紳士遮道者數百人勒去思碑焉

據增城志修

陳輝壁字光珮號琢齋曹村人年十七補縣學生二十舉鄉

試謁選授湖廣麻陽知縣麻民經亂田荒生聚後故籍紛亂有田者以虛糧為累輝壁下車即單騎履畝清丈定賦額民賴以甦又出俸金創義學延名儒訓士士即義學中尸祝焉善聽訟吏胥不能為奸莅麻五年以父母老請假終養畢補北直甯津縣甯津為衝繁地非麻陽比而輝壁釐剔奸弊教養兼盡一如在麻陽時在任五年以註誤被劾歸

據增城志修

呂其瀾字淡觀康熙間貢生少失怙母趙氏訓督甚嚴遂奮志力學博覽羣籍尤究心宋五子之書性方正雖燕處未嘗不衣冠有弟早歿撫其孤如己子朔望必詣講約所讀法聽者聳動感發詩文醇正簡古著有東川草堂集

據阮通志修

鍾文英字修五甘泉西洲村人康熙三十五年丙子舉於鄉授浙江龍泉知縣任三年勸農課士獎善懲奸刑政清簡丁

內艱貧不能歸士民相率餽薪米服闋補井陘合邑俗强悍
文英教以禮讓民風一變井陘當山陝甘蜀之交符節絡繹
柏井一驛路尤遠而險文英擬於甘桃立腰站請諸上官格
不行後擢中書舍人朝考日遂條陳柏井事宜得

旨俞允文英質而好義晚號晦叟所著有閩越遊草井陘正
續集劍川集藏於家據阮通志修

梁楨字貞木接龍舖人事父至孝康熙五十三年甲午舉人
性耿介廉潔任四川威遠縣襍破之官詢民疾苦盡出俸金
以賑貧匱俗多強娶楨為之設官媒正婚禮教化大興地多
旱田教民製桔槔挽水灌溉民享其利在任三年乞休卒之
日家無餘貲據張府志修

馮天載諸生少孤性至孝母歿廬墓五年每疾風暴雨必繞
墓悲號聞者酸楚初其鄉阻市遠母在時日走數十里市肉
以供母歿終身不肉食卒因哀泣過多致枯雙目據大清

馮雅玉幼孤性至孝母歿廬墓三年遇颶風走沙石拔木幾
盡獨其母墓無恙人以為至孝所感乾隆三年旌其門據大清

一統志張府志修

湛祖貴字仁昭沙貝人號東塘生而夙慧長有才名粵秀越
華兩院主席咸嘉與之年十六遊庠食餼中乾隆四十五年
庚子舉人聯捷進士初任江西永甯縣知縣調浮梁縣充戊
午同考官歷署定南廳同知永豐縣事善折獄卓異候陞為
當道所抑未仕時奉父命倡建泉源書院官浮梁捐俸重修
縣城巡撫金某奉

旨閱城極加獎賞公餘手不釋卷所著有式古堂文集紅荔

山房詩稿據增城志修

陳維嶽字崧生橋頭鄉人道光庚子舉人咸豐壬子進士籤分刑部三年乞假歸時紅巾賊將起消息甚惡維嶽集六都紳士議團練置礮械為禦賊計四年四月賊起東莞何六先據石龍復遣賊目朱真社據甯河何漢容據石灘陳旭何太康據河面而梁喜中煽惑城中七月維嶽與六都民壯萬餘屯於橋頭派勇護城環守四晝夜十六日與賊大戰於河上適天大風雷民勇失利賊乘勢攻橋頭城內奸民開門迎賊城遂陷時知縣倪森方病倉猝無備賊得知縣不殺而自出擄掠城外村庄一時皆應賊無與抗者維嶽獨與諸生潘榕尹承先等裹瘡再起招集村農千人曉以大義皆願死戰時賊目何六趨省垣留賊八千交賊目葉阿胡統帶復於閏七月

月傾巢出繞道薄橋頭時我軍先設伏兩翼夾擊自辰至午賊始敗走連日敗賊於蔣村廖村又敗賊於西門北門賊奔回西山老巢各勇乘勝爭先縣城遂復而倪令亦卒遂以知縣率勇復城報總督葉名琛上其事得

旨維嶽以直隸州先用戴花翎倪森給雲騎尉世職當是時維嶽兵威大振賊以全隊趨省城縣境不敢過問縣賴以安事平維嶽不謁選卒年四十八人咸惜之據采訪冊修以上增城

陶璜字黼子新會人

大清兵克廣州時從父翼宸走鄉落遇風覆舟父溺璜自舵後得出更字苦子生而端凝十歲能文章補諸生久之棄去奉母陳避地儼舍以居凡十數徙所至掃一室設書史香茗旦夕寢處其中性孤癖嗜吟詠雖在塵俗囂雜間持筆注思

若罔聞見居平考究古今得失山川險易人材盛衰之故媿

媿辯論輒數夕不休自奉儉薄有所積悉以周人當事仰其

才欲見之終不可得家廟在郡城經亂為兵所据乃別建於

西郊新會有三廣公石坊將頽又揭貲新之廣州撤藩民復

舊業璜先業為人所隱上片紙可復而璜恥與較置弗問年

五十三卒著有慨獨齋遺稿握山堂集按番禺志璜自高曾

百年故入國朝長往不返其名齋曰慨獨者取

葉夢稷父早世母遺腹生夢稷故自號瞻何順治十四年丁

酉舉賢書公車不第戀母不赴選崇尙正學擯二氏曠懷安

遇彈琴樂道有白沙之風所著有中庸辯訛一卷祀鄉賢阮

林宜逢邑諸生順治中與母俱繫圍城中有悍卒欲烹其母

宜逢求以身代許之及解衣見其癯瘦將置之其黨不從宜

逢妻陳氏曰子代母妻可代夫願就烹遂為所烹食時人稱

曰孝子義婦之門大清

黃慶錫字如金以字行瀧水都人有至性當明季時其祖父

母及父俱被盜黃景緣屠害慶錫依舅氏家得免及長為諸

生誓報祖父仇常淬短劍置枕旁血淚漬刃或與仇遇未得

間則佯嬉笑使不為備順治間景緣復叛旋就撫一日慶錫

遇之瞋目直前出所蓄劍奮刺洞胸其僕佐之挾景緣首闔

郡稱快慶錫詣縣請死當事義而釋之據張府

蘇楫汝字延孫順治十八年辛丑進士授太康知縣瀕河多

水患田有被潦者楫汝力請免其賦復有臨漕二米解費及

槓夫工食最為民病悉為革除會叛藩倡亂偵知奸民響應

廣州府志 卷一百三十四 列傳二十三

尅日將襲邑城楫汝遂單騎率數人擒渠魁寘諸法得其名籍焚之亂以定尋擢中書舍人民感其德建祠祀之據張府志修

黃離炤字爾錫黃浦人順治八年辛卯鄉薦選米脂令邑因李闖作亂民盡流亡城居民不滿百離炤加意撫字還者數千家舊例每歲科丁差銀一千餘兩民苦重役離炤力請減免學宮久毀捐俸倡修士之文而貧者出廩帛給之人始知向學歷五載訟息刑清有鹽商用偽票販私鹽應置重典商哀告母老訪之得實遂從末減商餽百金為壽正色却之康熙十三年卒於官據新會志修

吳季珩字逸季少與兄郎閉戶下帷自相師友領順治十一年甲午鄉薦選宣城令政尚寬簡康熙十一年黔滇叛亂全楚震驚時寇數萬下南漳窺宣城季珩調集鄉勇扼險堵禦

宣城賴安季珩以積勞成病及地方稍定上書乞休去之日惟一肩行李而已據新會志修

鍾昌先字耀世沙頭人性坦易有度嘗為賊掠索贖幽禁半載始出一日遇之門外賊怖請死昌先慰而遣之人問故曰彼迫於饑寒耳非仇我也舉順治十四年丁酉鄉薦授烏程令烏程先被水歲饑昌先至糜粥以食饑者首請發倉平糶閱視災傷請蠲恤又請改漕運為折色明年歲復大旱露禱得雨民大悅墟田崩陷民受累者歷百餘年昌先力請奏豁除浮稅八十餘頃有邵堯仁沈燊等三十二人以產價羈比者十四載破械出之民有十大恩政之謠後以鹽觔踰限論罷百姓爭歛錢贈之乃得歸抵家數月卒據新會志修

張偉仁字質光凌冲人領康熙二年癸卯鄉薦榜姓梁時里

賊嘯聚偉仁集鄉老請於總督吳興祚捕賊殺之里得安堵
初雷州有黃三者妻女為賊所擄跡至邑城貸金於偉仁以
贖之後償以偽金偉仁不復問任揭陽教諭再補欽州學正
以疾乞休歸子成遇顯遇成遇字德士顯遇字德常皆好學
能文康熙三十六年丁丑同拔貢三十八年己卯科復同雋
明年成遇成進士選庶常未幾以疾歸顯遇授英山知縣革
一切陋規遷修學宮創三城樓治奸梗尤嚴與人誦之雍正
三年以足疾歸成遇初以文自負後盡燬舊草徧覽宋儒傳
註以精其義浸淫子史以廣其才為文不假思索未嘗屬草
假歸後遽卒人咸惜之顯遇於琴詩雜藝皆能淹通尤工古
文詞回籍後杜跡公門闢坳園徜徉賦詩丐文者戶外為滿
父子繼志人皆稱為有道長者

據新會志修

任清漣字秋浦紫霞人由南海學領康熙八年己酉鄉薦十
二年癸丑成進士授清河知縣初其父猶龍處家雍睦尤能
撫孤恤寡及清漣筮仕著潔己愛民二箴授之以行清漣抵
任後有蝗入境引咎自克為文祭之一夕飛去邑瀕大河南
總河杜輔興屯田取邑淤田二千頃為屯田丈量甫報竣又
檄於民田中割一千五百頃歸屯蓋通民間熟業積其餘為
隱田又以餘田零星圈其方整者為屯而以零星之田償被
圈者民大擾清漣上屯田議力言其非便大拂總河意欲劾
之清漣不為屈時漣座師孫在豐以工部巡河力主漣議事
雖得息滋為總河所嫉遂慨然以終養歸歸奉其父歲餘父
乃卒服闋後清漣亦卒年四十八子五人榛字大鴈工詩以
例貢老椅亦有詩名椅子大中雍正七年己酉舉人榛子必

進乾隆六年辛酉舉人

據新會志修

呂諦作城南人與邑諸生趙支榭素昧平生一日同遇盜劫

定交患難中諦作家人罄資得百金往贖趙因呂歸大慟以

貧不能為計也諦作義不獨免囑支榭先歸而已留質支榭

歸僅贖十餘金恐累呂復詣賊代賊兩義之並釋歸

據張府志修

陳吳昌字倬開陳涌人康熙八年己酉舉人性至孝每親疾

侍藥衣不解帶乙卯偽周倡亂土賊困城時縣令謀請援兵

皆懼莫敢往吳昌奮然縋城出詣江門見孫總兵言狀求救

聲淚俱下孫為動容乃發騎間道躡賊前後夾攻大破之城

賴以安父老見吳昌羅拜稱陳孝廉活我云

據張府志修

張翩然字叔軒沙富人舌耕供滫瀡事母甚得歡心母終哭

慟幾絕遂得肺病康熙十一年壬子闈中擬元以卷污黜撤

棘後主司召相見翩然以乞憐非道竟不往性剛介講學於

家以師道自重教人以居敬慎獨為主著經書要旨闡發紫

陽奧義為儒者所宗

據張府志修

莫象年字休賢邑城人康熙十四年乙卯舉人授平鄉令縣

舊有田畝陋規逾萬金象年悉革之邑東富洋河堤久廢水

漲輒漫沒民田為捐俸倡築長堤十餘里護田數百頃又捐

浚新舊井五百以資灌溉民食其利為立生祠丁艱起補工

部屯田主事監督兩審革巡驗常規擢戶部山東司郎中致

仕歸

據阮通志修

梁壯士佚其名瀧水農家子也戊午己未間其族華典華胄

兄弟者為大盜官兵將行勦鄉人有玉石俱焚之憂壯土方

弱冠請於眾曰吾能除之顧兩喪未舉得三十金畢吾事則

湯火不避耳眾與之金既營窳窳乃假擄捕遊二寨間與賊狎一日典方卧壯士袖小斧入猝擊之死斷其首裹而出叱羣盜曰官軍立至汝主從寨後遁矣羣盜驚散復趨冑寨叱如前入見冑附耳語冑蒼黃則又擊斬之如典持兩首還無遮拒者鄉人聞於官勦議乃寢壯士不永年而卒金竹胡方奇其勇畧為詩紀其事

據鴻梅堂集修

陳士一石頭村人讀書明大義行不越矩親年八十綵舞兒啼日為親歡親歿廬於墓側風木之悲三年如一日雍正二年公舉孝子建坊旌表

據郝通志張府志修

胡方字大靈金竹岡人學者稱金竹先生由番禺籍補諸生久之充歲貢講求義理之學敦崇實行年十二應童子試廣州司李涂某奇其文延與語謂當薦之學使方端坐不答亦

不再至總督吳興祚聞其名使其客招之方走匿不能得也四十歲後陋巷敝廬杜門不出註周易六卷四子書十卷句梳字櫛補先儒所未及制義千首有奇與著書相表裏註莊子四卷三禮左國諸史古文悉有考訂批疏其居喪稻草藉柩旁地寢三年不入內先人田廬悉與弟而自以硯耕得錢雜置硯旁族若姻之不能自存者令取之盡則止有達官齎重金乞其文為壽不應吏懾之不應家人告以絕粒不應不妄取一錢或窺其乏餽之雖其親暱無辭不受也見一行之善即農夫野老訂平生歡鄉曲子弟偶蹈不韙有願就鞭撲不願聞其事於方者里中語曰願被他人笞勿使胡君知他人笞猶可胡君愧煞我聞令童子適市販者知為胡家童不飾價不售偽其誠感人如此元和惠士奇上薦疏於朝略曰

臣視學廣東逾五載矣每試一郡輒問其鄉之人物欲得一積學力行有道而文者為諸生楷式獨番禺學歲貢生胡方人品端學術醇一介不苟五經盡通能詩工書註易及四書多所闡發接理學之傳粵人比之江門陳獻章其教人從日用酬酢求義理從尋常應對見文章大要以力行為主不徒以語言文字也惜其年衰老不能効奔走之勞尚足備羽儀之用伏乞

賜之命服併依古養老之禮令有司月致羊酒以寵異之俾士子咸知讀書立品實雍正四年事也先是方僑居南海之鹽步惠艤舟村外遺吳生者至其家求一見急揮手曰學政未蒞事不可見不可見出吳而扇其門惠再至索所著書僅乃得之惠試竣仍介吳生則假一冠投刺至長揖曰今日齋

沐謝知己方年邁無受教地不能執弟子禮數語遂起惠握其手曰縱不肯多語敢問先生鄉人誰能為文章者答曰並世中無人必欲求之惟明季梁朝鐘耳惠遂求梁文併其文刻之名曰嶺南文選惠常語吳生曰胡君貌似顧甯人豐厚端偉皆富貴福澤之象不於其生必享大名於身後蓋方之知已當時一惠而已卒年七十四道光己亥祀郡鄉賢

集薦疏
事蹟修

據南
潤文

黃騰五杜阮人幼失恃事父至孝事繼母如其母兄騰三往西粵中途為舟子所戕騰五尋獲兄屍聞官以殮又廉得賊所乃孤身擒殺復其讎時同鄉族人以孝友聞者又有黃隆

光
一據
大清
統志
修

倫相國字學登西關人少讀書明大義弱冠有勇畧充行伍

嘗從征臺灣及雲南補外委百總守虎坑汛屢巡獲海寇星累去官以屬鄉紳者請畱緝賊初洋匪李英芳倡亂相國捕之不獲英芳銜之至是以孤舟誘相國相國率二巡艘追捕入新沙滯賊舟忽四集眾欲逃相國不可奮戰被重傷大呼滅賊數聲而卒年四十四無子鄉人感愴建祠睦洲墟祀之并以殉難士卒吳立禮等七人從祀其後賊攻睦洲眾哭禱祠下迎其主以拒賊士民奮呼賊驚退不敢再至人咸謂英

靈不泯云

據阮通志修

黎大剛字恭健都會人乾隆四十六年辛丑武進士第三人授廣西提標遊擊歷仕至鎮安協鎮安與滇黔接壤苗匪不時窺伺大剛至飭軍政宣德威撫綏得宜羣苗向化民賴以安提督彭承堯稱其弭盜化頑無愧邊陲大將云性孝友事

親承顏順志養祭盡禮家貧淡泊自甘居官不易其素廉俸所入悉分惠諸弟年六十六告歸卒於家

據阮通志修

李自明三村人由行伍歷官連陽營守備嘉慶四年與同邑順德協左營千總張耀新會營把總鄧國祥順德營把總陳士英隨軍征勦四川教匪俱力戰陣亡奉

旨崇祀省城昭忠祠世襲雲騎尉

據阮通志修

何岳鍾字居貞號六湖邑城尚書坊人前明吏部尚書熊祥八世孫也中嘉慶九年甲子武鄉試十四年己巳會試武進士藍翎侍衛期滿以守備用呈請改用東省外海水師歷任碭州都司吳川中軍守備吳川營都司龍門協左營都司陽江協副將碭石鎮標中軍外海水師遊擊海門營參將澄海協副將南澳鎮總兵陽江鎮總兵浙江黃巖鎮總兵廣東虎

門水師提督道光二十二年四月以目眚請開缺調理岳鍾熟於史事上下數千年彙彙如貫珠故所履任毅然以訓練整飭爲先務其在侍衛也十八年九月林清之案防禦有功詔賞加二級至澄海歲大饑岳鍾先捐俸賑濟全活無算廩生林鳳儀作歌紀之至今澄人猶謳思不置云在陽江值大風水驟盈丈餘岳鍾分派弁兵泛舟載食兼拯飢溺民賴以安其在海門也創建蓮峯書院訓以義讓入謂有敦詩說禮之風道光十八年以陽江鎮再任期滿進京

召見四次

賞克食三次人驚爲異數焉署理水師提督整飭船礮練習士卒海波不興卽以目眚家居而咸豐四年之後猶令其子其晏捐貲募勇備攻守焉卒年七十五

據采訪冊修

何瑄號菱塘新會城內人道光丙午舉人三上不第謁選得教職需次歸咸豐四年賊起瑄與邑令陳應聘議團練張榜募勇七月初八日賊首陳松年呂萃俊等作亂初十日弁兵登陴守禦時陳令專以守城事委瑄乃以原任新甯把總何定章主軍火舉人何超光主調撥巡檢張青柏主糧餉諸生陳殿蘭主文告武進士許德元梁英忠主巡察其外帶兵者黃龍標駐水閣外委張朝顯駐馬山守備吳元陞駐西山部署旣定而賊大至十五日黎明大雨賊率眾趨東門應聘親督戰礮斃其執旗賊目賊艘由東河入者並擊走之是時城西南隅新募卒心不固瑄在局遽起曰官在東東無虞西南皆市人子安危視此刻也疾南馳周陣大呼賊敗矣東南虜尸且山積於是我卒之投械驚竄者至是皆歸伍賊諜知守

具單薄連日環攻十八夜大雨風樓燈燭不能然賊乘間
蠡薄勢尤急幸電光照耀如白晝我兵發鎗多中自初更至
四更賊始退諸坊堡歡聲雷動咸願募勇以備番休人心稍
定而賊志在必得閏七月初旬開倉平糶貧戶至拔草薰鼠
而食無變志者而是時大小已二十餘戰死亡相繼更乏膏
燎八月初六夜四鼓賊乘潮縱火船四艘直攻曲背城水閣
龍標定章捨命拒之賊鋒乃挫自是賊稱堅城守死不可下
而省城兵至圍乃解事平權長樂訓導錄前功以知縣用加
六品翎頂自以性剛直弗堪州縣久未謁選邑有大事官民
皆倚重之同治三年客匪由開平犯邑之石步卒不得入皆
瑄策也平生富學殖詩服膺獨漉力追盛唐文寢饋昌黎每
有作輒閉戶冥搜一字不憚屢易卒年五十五著有藕花池

館詩文集子應榜郡學生

據新會志修
以上新會

南海李徵爵分纂 番禺史悠履初校 番禺史悠乾再校

番禺金佑基三校 南海顏以湘四校

廣州府志卷一百三十四終



